

Վ. Ա. ԱՐԴՅԱԳԱՏԻ ԱՌԱՊԱՐԻ ԿԱՄ ԶՈՒԾՈԹՆՈՅ
ԵԿԵՂԵՑԻՆ*

Դ.

Պեղումները Զուարքնոց Եկեղեցու աւերակներում եւ այլ
ընդ այլոյ զրոյցները:

Խաչիկ Հայրասուրբը 1900 թուի յունիս ամսին սկսեց
պեղումն Զուարթնոց Եկեղեցու աւերակներում: Որքան ա-
ռաջ էր գնում պեղումն, այնքան բազմանում էին այլ ընդ
այլոյ զրոյցներն ու առասպելները այդ Եկեղեցու մասին, ո-
րոնք դժբաղդաբար արձադանք գտան հայ և օտարազգի լր-
րագրերի ու օրագրերի մէջ էլ: Թիֆլիզի „Խոօս Օօօզրենի“
լրագրի 1901 թուականի 5670 համարում տպուած է „Պա-
ռուկու ճաշական հայութեած կամ Զուարթնոց Եկեղեցու¹
շուրջը. Բ. որ Երազմայն և այլ աստուածների մեջեանը Եղել է
Զուարթնոց Եկեղեցու տեղը Վաղարշապատում, ուր տեղի է
ունեցել և Լուսաւորչի յայտնի տեսիլը և ուր, այսինքն Երազ-
մայն մեջեանի տեղում՝ ո. Լուսաւորչի կառուցած Վաղարշապա-
տի կաթուղիկէն կամ ո. Էջմիածինն է Զուարթնոց Եկեղեցին. Գ.
որ ս. Լուսաւորչի մասունքները ամփոփուած են Խանդարած Եկե-
ղեցու չորս սների տակ և Հ. Խաչիկը սներից մեկը մինչեւ Հիմքը
քանդելով՝ գտել է այնակեղ մի մասը. Դ. որ Խանդարած
Եկեղեցին ծածկուած է Եղել Հողի թանձը շերտերի տակ և
Հ. Խաչիկը, մի միտյն պատմական ցուցունքները հիմք ունենա-
լով՝ պեղել և յայտնագործել է մի արդէն վաղուց, անշետա-
ցած և մոռացուած հնութիւն: Յաւի սիրտ պէտք է ասենք
որ այդ զրոյցները շարունակուում են կրկնուել լրագիրներում,

* Նար. «Արաբատ», սեպտ. հոկտ. էջ. 876:

մինչև անգամ հեղինակաւոր անձինքներից—Կավազъ 1902. (№ 304):

Մշակի խմբագրութիւնը ԽօօԵ ՕօօՅՑԻԵ-ի այս յօդուածի առիթով «Մամուլ» բաժնի մէջ մի զիտողութեամբ համառոտակի ցոյց տուեց վերև յիշուած ենթաղրութիւնների անհեթեթութիւնները և դատապարտեց շահասիրութեան համար հասարակութեանը մոլորեցնելու ձգտումն։ Բարդուղիմէոս Սրբազննը Նոր-Դարի 1901 թուի 72 համարում ԽօօԵ օօօՅՑԻԵ-ի վարկումներն անհիմն համարելով՝ խոստանում է մի տուանձին շարաղրութեամբ արժանաւոր պատասխան տալ։ Նորին Սրբազնութիւնը «Խորենացուն Խորենացով պէտք է հասկանալ» իւր երկասիրութեան Բ. Հատորի յաւելուածի մէջ շօշափում է այս խնդիրը (եր. 165—174), իրեն ծանօթութիւն բուն զրբի իԲ. զիսի։

ի՞նչ աղքիւրներից են առաջանում այս այլանդակ զրոյցները՝
այդ չեղ հետաքրքրողը, որովհետեւ յարդանս Խաչիկ Հայր-
սուրբի պէտք է խոստովանենք, որ նա իւր ստորագրութեամբ ոչ
մի յօդուած չէ հրապարակել վերև յիշուած ենթադրութիւն-
ները հաստատող. չենք ել կարող տարածուած զրոյցներն ու ա-
ռասպելները համարել զանազան մարդոց տպաւորութիւնների
արտայայտութիւն։ Ուրախութեամբ պէտք է ասենք, որ Խաչիկ
Հայր-սուրբը իրքեւ ու Էջմիածնի միաբան՝ ու Էջմիածնի պատ-
մական նշանակութիւնը գիւրահաւան ռամկի աչքին նսեմաց-
նող զրոյցների մի մասը, որ իրը թէ Խանգարած եկեղեցին է
ու Լուսաւորչի հիմնարկած Կաթուղիկէն, կամ Էջմիածնինը՝
հերքեց հրապարակաւ (Մշակ, 1902 № 285)։ Նա զրոյցների միւս
անհեթեթութիւններն ել պէտք է հերքէ, բայց ոչ միայն մինչեւ
այսօր չէ արել այդ, այլ «Եկեղեցի Հայաստանեայց» կրօնական
ամսաթերթում իւր մի փոքրիկ յօդուածը ստորագրել է «Ա. ա-
նահայր Զուարթնոց Մայր Եկեղեցւոյ», տիտղոսով։

Զուարթնոց եկեղեցին Մայր չէ կարող կոչուել, որովհետեւ
Մայր եկեղեցի միայն ու եջմիածինն է, իբրև Աթոռ Հայաստան-
եայց եկեղեցւոյ, և իւր հարազատ վանահայրն ունի յանձին Վե-
հափառ Կաթողիկոսի: Զուարթնոց եկեղեցին մեր պատմիչնե-
րից ամենելին Մայր եկեղեցի չի կոչուել, և այդպէս կոչելու

Էլ հիմք չըկայի Խաչիկ Հայրսուրբը չի կարող վանահայր կոչուել Զուարթնոց եկեղեցու, որ աւերակ է և հիմնովին կործանուած. աւերակի վերահսկող կոչումն թերեւս յարմար դայ իրան, բայց վանահայր կոչումն՝ բնաւ երեք. մանաւանդ որ ինքը՝ Խաչիկ Հայրսուրբը, էջմիածնի միաբան է և միաբանների շարքում բնակարան ունի ու հանդերձազին է ստանում: Մեզ թւում է, թէ Խաչիկ Հայրսուրբը ոգեսորութեան բոպէին անխօրհրդաբար է վարուել, ստորագրելով «Ա. անահայր Զուարթնոց Մայր եկեղեցւոյ»:

Ա.

Վաղարշապատը եղել է իւր այժմեան տեղում եւ ոչ
Զուարթնոց եկեղեցու ռուրջը.

(Զուարթնոց եկեղեցու տեղը եւ նրա կառուցման
ժամանակը:)

Վաղարշապատի ճիշդ աեղադրութիւնը և նրա կենտրոնում եղող ս. էջմիածնի աեղը ստուգուած է Աղաթանգեղոսով (տպուած կ. Պոլիս 1822 թուին):

Վաղարշապատը կենտրոն ընդունելով՝ Աղաթանգեղոսը ասում է, որ Հնձանքը (այժմեան ս. Շողակաթի վանքից դէպ արեւմուտք փոքրիկ եկեղեցու մնացորդը) քաղաքի Արեգ դռնից դուրս՝ արեւելեան կողմն էր գտնւում: իսկ ս. Հռիփսիմէ կոյսը նոյն Արեգ դռնից դուրս գալով և դէպի հիւսիս ուղղուելով՝ Արտաշատի ճանապարհին մօս, մի սարաւանդակ բարձրաւանդակ աեղում աղօթելիս՝ նահատակուեց (եր. 66—73): Ուրեմն, թէ Հնձանքը և թէ ս. Հռիփսիմէի նահատակութեան տեղը Վաղարշապատի պարսպից և Արեգ դռնից դուրս՝ քաղաքի արեւելեան կողմն էին գտնւում: իսկ Վաղարշապատը Հնձանքից և ս. Հռիփսիմէի նահատակութեան տեղից դէպի արեւմուտք էր. մինչդեռ Զուարթնոց եկեղեցին Հնձանքից էլ ս. Հռիփսիմէի նահատակութեան աեղից էլ չորս վերստաչափ հեռի՝ դէպի արեւելք է, Հնձանքի և ս. Հռիփսիմէի վանքի նկատմամբ Վաղարշապատի բոլորովին հակադիր կողմը: Որպէսպի Հնարաւոր լինի ասել, թէ Վաղարշապատը Զուարթնոց եկե-

զեցու շուրջն էր, պէտք է Զուարթնոց եկեղեցին տեղափախել և, Հռիփսիմէի և ս. Նողակաթի վանքերից դէպ արևմուտք:

Աստ Ագաթանգեղոսի՝ Վաղարշապատը շրջապատուած էր պարկէն փասով։ Ս. Գայիանէ կուսին քաղաքի հարաւային դռնից դուրս քաշ տաղով՝ այն ճանապարհի վերայ, որ տանում էր դէպի Մեծամօրի (Ու ջուր) կամուրջը, պարկէն փոսի մօտ նահատակում են։ Այդ տեղ է ս. Գայիանէի վանքը։ Ուրեմն քաղաքի հարաւային սահմանն էլ յայտնի է։ Այդ սահմանները ստուգում են կանգուն մնացած և ս. կոյսերի անունով՝ նրանց նահատակութեան տեղը, կառուցուած շէն վանքերը։ Խոկ թէ, յիրաւի, վանքերը շինուած են այն տեղերումն ուր նահատակուած են ս. կոյսերը՝ հաւատիսցնում է Ագաթանգեղոսը։ Նա ասում է (եր. 76), որ ս. Լուսաւորչը Խոր վիրապից դուրս գալուց յետոյ, ս. կոյսերի նահատակութեան իններորդ օրը, նրանց մարմինները առ ժամանակ մի ամփոփելով՝ Հնձանքում՝ վաթսնօրեայ քարոզութիւնից յետոյ հաւատացեալ թագաւորի և ժողովրդի գործակցութեամբ թաղում է նրանց նահատակութեան տեղերում, քաղաքից դուրս, և նրանց դերեկմանների վերայ վկայարաններ շինում — մէկը քաղաքի հիւսիս արևելեան կողմը ուր նահատակուեց ս. Հռիփսիմէն երեսուն երկու ընկերներով, մէկը Արեգ դռնից դուրս՝ այդումէջ, Հնձանքի տեղը, ուր ս. կոյսերի օթեանն էր, և մէկն էլ հարաւային կողմը, ուր ս. Գայիանէն երկու ընկերներով՝ նահատակուեց (եր. 279)։ Այսպէս ուրեմն Վաղարշապատն ընկեսում է Հնձանքից և ս. Հռիփսիմէի վկայարանից դէպի հիւսիս Ճիշդ այն տեղը, ուր այժմ կայ։

Այս բոլոր վկայարաններն էլ այժմ շէն են և յաւիսենական արձանն Վաղարշապատի արևելեան և հարաւային սահմաններին։ Խոկ Մայր Աթոռի կամ, ինչպէս հնումն էր կոչւում, Կաթուղիկէի տեղը քաղաքի կենտրոնումն էր, արքունի ապարանքին մօտ, այնտեղ, ուր տեղի ունեցաւ ս. Լուսաւորչի յայտնի տեսիլքը (Ագաթ. 272 երես)։

Ինչպէս տեսանք, Զուարթնոց եկեղեցին ա. Ագաթան-

գեղոսի ցոյց տուած Վաղարշապատի արևելեան սահմանից, Արեգ գանից, գեռ էլի չորս վերստ հեռաւորութեամբ դեպի արևելք է գանւում, ուրեմն չէ կարող Վաղարշապատի կենարոնում լինել. բ. չը լինելով Վաղարշապատի կենարոնում չի էլ կարող լինել ո. Լուսաւորչի յայտնի տեսիլքի տեղը. Հետեարար և չէ այն եկեղեցին, որ ո. Լուսաւորիչը շինեց իւր աեսիլքի տեղը, արքունի ապարանքին մօտ, որ կոչւում էր կաթուղիկէ, իսկ այժմ կոչւում է էջմիածին. և գ. Զուարթնոց եկեղեցին քաղաքամիջից, այսինքն ո. էջմիածնից, չորս վերստ հեռու Յ զար յետոյ շինուած է Առապարում, որ նշանակում է անմարդարնակ, բուսականութիւնից զուրկ, աւազոտ և անջրդի տեղ (Սեր. եր. 118—119): Հենց այսօր էլ Զուարթնոց եկեղեցու աւերակները գանւում են մի այդպիսի սարաւանդակի վերայ: Այդ տեղը անշեն, անմարդարնակ է եղել մինչև Ներսէս Դ: Որպէս զի կարելի լինի հնարել այնպիսի առասպել, թէ Վաղարշապատը Զուարթնոց եկեղեցու շուրջն և Զուարթնոց եկեղեցին էլ էջմիածինն է, պէտք է նախ և առաջ Հնձանքն ու ո. Հայփախմէի շէն վկայարանը տեղափոխել Զուարթնոց եկեղեցու արևմտեան կողմից նրա հիւսիս—արևելեան կողմը, Փարաքար զիւղի մօտ. որպէս այդ անկարելի է, ուստի և Խաչիկ Հայրառուրը խոհականութիւն ունեցաւ Մշակի 1902 թ. 285 համարում տպել հետեւեալը. «Էջմիածին» դեկտեմբերի 20-ին. «Որովհետեւ վերջերս կովկասի զանազան թերթերում լոյս տեսած թղթակցութիւնների մէջ ինձ վերագրեցին, որ ես իրը թէ իմ գտած եկեղեցիների աւերակներն եմ ընդունում և հրատարակում որպէս ո. էջմիածին, ուստի սրտանով պատիւ ունիմ հրապարակով յայտնելու, որ յիշեալ կարծիքը անհեթեթութիւն է և հնարովի որպիսին ես երրեք ինձ թոյլ չեմ տուել և հիմք էլ չունեի թոյլ տալու»:

«Խնդրում եմ բոլոր խմբագրութիւններից արտասպել սոյն երկտող հերքումն ի միամտութիւն ընթերցողների»:

Հերքումն թէև առանդական է, բայց այնուամենայնիւ կարելի է եղբակացնել, թէ ինքն չ. Խաչիկը չէ թելագրողը, որ Խանդարած եկեղեցին են համարում ո. էջմիածին: Այսպի-

սով, օրհնեալ է Աստուած, Վաղարշապատն էլ, կաթուղիկէն կամ և, Էջմիածինն էլ, և կոյսերի վկայարաններն էլ մնում են իրանց յաւիտենական տեղում իրանց մեծակառոյց շինութեամբ և երկնաբերձ գմբէթներով։ Դրանք մեր պատմիչներից կոչում էին Եկեղեցիք Վաղարշապատայ։

Յայտնի է պատմութիւնից, որ Զուարթնոց Եկեղեցու տեղը անմարդաբնակ առապար էր, և Ներսէս Գ-ը է. դարում առաջին անգամ ջուր բերեց ու շինցրեց այդ վայրը։ Այս բանը վկայում է Ներսէս Գ. Շինողի ժամանակակից Սերեսու եպիսկոպոսը իւր «Ի Հերակլին» պատմութեան մէջ։ Ահա նրա խօսքերը. «Յայնմ ժամանակի արկ ի միտս իւր կաթուղիկոսն Հայոց Ներսէս շինել իւր բնակութիւնն մերձ առ և Եկեղեցեացն՝ որ ի Վաղարշապատ քաղաքին, ի վերայ Ճանապարհին՝ յորում ասեն, ընդ առաջ եղեւ թագաւորն Տրդատ Սրբոյն Գրիգորի։ Շինեաց անդ Եկեղեցի մի յանուն երկնաւոր զուարթնոց, որոց երեւալ ի տեսլեան Սրբոյն Գրիգորի երկնաւոր զաւրացն։ և շինեաց զեկեղեցին բարձր շինուածովք և չքնազ զարմանալեաւը, արժանի աստուածային պատուոյն՝ որում նուիրեացն։ Ա. Ճուր և երեր զգեառյն և արկ ի զորք զամենայն վայրսն առապար, տնկեաց այգիս և ծառատունիս և շուրջանակի պատուարեաց զբնակութեամբ գեղեցկադիր յաւրինուածով, բարձր պարսպաւ, ի փառս Աստուծոյ» (Սեբ. Հրատ. Ք. Պատկանեան 1879թ. եր. 118—119)։

Այս հատուածից երեւում է առ որ Ներսէս Գ. շինում է Եկեղեցին ոչ թէ Վաղարշապատում, այլ Ճանապարհի վերայ, այնտեղ՝ ուր Տրդատը ընդ առաջ էր զնացել Արտաշատի Վիրապից ելած և Վաղարշապատ վերադարձող ա. Գրիգորին. ընդառաջումն, ինչպէս յայտնի է Ագաթմանդեղոսից եղել է քաղաքի պարսպից դուրս. բ. Ներսէս Շինողը կառուցանում է Եկեղեցին՝ Վաղարշապատում արդին գոյութիւն ունեցող Եկեղեցիներին մերձ բնակութիւն ունենալու համար. ուրեմն Վաղարշապատն ու իւր Եկեղեցիքն, որք են՝ կաթուղիկէն, քաղաքի կենտրոնում արքունի ապարանքին մօտ, և առ կոյսերի վկայարանները, քաղաքի պարսպից դուրս (ըստ Ագաթմանդեղոսի), արդէն առա-

ջուց կային. դ. Ներսէս Գ. շինում է եկեղեցին ոչ թէ, տեսալեան տեղը, այլ Տրդատի ընդառաջ ելած տեղը, միայն՝ ի պատիւ տեսիլքի մէջ երեցած երկնաւոր զօրքերի, կոչելով ջուարթնոց եկեղեցի։ Ջուարթնոց կոչումն ապացոյց չէ, թէ ո. Գրիգոր այնտեղ տեսած լինի երկնաւոր զօրաց բազմութիւն, ինչպէս Գուինի եկեղեցու ո. Գրիգոր կոչուելը ապացոյց չէ, թէ ո. Գրիգոր 1.ուսաւորիչը այնտեղ եղած, որ և է գործ կատարած, կամ նահատակուած լինի։ — Տագանրօդում ս. Յակովի Մծբնայ Հայրապետի անունով Հայոց եկեղեցի է կառուցւում, դրանից չի կարելի հետեցնել՝ թէ ո. Յակովի Հայրապետը Տագանրօդում եղել կամ այնտեղ նահատակուել է։ — դ. Եթէ ջուարթնոց եկեղեցու շուրջը բնակութիւն եղած լինէր երբ և իցէ, անշուշտ, մարդկային քաղաքակրթութեան հետքեր մնացած կը լինէին։ Բայց պատմութիւնից երեւում է, որ Ներսէս Գ. գետից նոր է ջուր բերում և բոլոր առապար վայրը մշակում այդի և ծառաստան տնկում։ ուրեմն առաջ տեղը անշէն և անմարդաբնակ է եղել, զուրկ բուսականութիւնից։

Ջուարթնոց եկեղեցին կառուցանող Ներսէս Գ. Հայրապետական իշխանութիւն վարում էր 640—661 թուականը (Պ. Եղեան, 1887 թ., Հրատ., Վեռնդ պատմ. ծանօթութիւն 14)։ Յունաց կոստանդին կայսրին հաճոյաւնալու համար 648 թուին Ներսէսը հաղորդուելով յունածէս պատարագին՝ ատելի եղաւ Հայոց, պարտաւորուեց հետանալ Դուինի Հայրապետանոցից դէպի կ. Պօլիս և, այնտեղից յետ դառնալիս՝ դադար առաւ իւր Հայրենի Տայք գաւառում։ զի իշխանն Աշտունեաց և այլ իշխանքն որ ընդ նմա անհնարին ցասմամբ փքացեալ էին ի վերայ նորա» (Սեբես եր. 143)։ Ներսէսը, Թէոդորոս Աշտունու մահից յետոյ, 654 թուին, վեցամեայ բացակայութիւնից վերադառնալով Հայրապետական աթոռը՝ շարունակեց իւր ընդհատուած իշխանութիւնն ու եկեղեցու շինութեան գործը։

Պ. Բասմաճեանն էլ (Բանասէր Հատ. գ. պլակ ա. 1901 թուի, եր. 33—34) Ներսէսի Հայրապետութիւնը զնում է 641—661 թուին և շեշտում է Ներսէսի յունամոլութիւ-

նը, ահա... Տակաւին արձանագրութեան մասին չըխօսած կարժէ որ քանի մը տողերով անցողակի յայտնեմ թէ Զուարթնոց կամ Առապարի և. Գրիգոր Եկեղեցին կառուցուած է հրամանով Ներսէս Գ. «Նինոզ» կաթուղիկոսի (641—661): Եւ իրօք գտնուած խոյեակներէ ոմանց վրայ յունարէն տառերով գրուած է «Ներսիսի» և «կաթուղիկոսի». մենագրութիւնները, որ կը յայտնեն Ներսիսի յունասիրութիւնը, իսկ ՓԲ. դարու ժամանակագիր Սամուէլ Անեցին կը գրէ թէ 654 թուին հաստատուած է այս Եկեղեցին.—Ո՞՛Դ. Հայրապետն Ներսէս շնէ զոււրբ Գրիգոր զզարմացուցիչն տեսողաց»:

Ըստ Սեբեսի՝ Զուարթնոց Եկեղեցու հիմնարկութիւննու կառուցումն տեղի է ունեցել նախ քան Ներսէսի գժառուելը Թէոդորոս Ռշտունու հետ ու աքսորուելը (Սեբեսու եր. 118—119), ուրեմն իւր հայրապետութեան առաջին տարիներում այսինքն 640—648 թ.: Սամուէլ Անեցու առաջ բերած թիւը վերաբերում է Ներսէսի՝ աքսորից վերադառնալուց յետոյ, Եկեղեցու թերին լրացնելուն որի համար Սեբեսու ասում է (եր. 150—151). «Փութայր կատարել զշինուած Եկեղեցւոյն զոր շինեաց ի վերայ պողոտային Վաղարշապատ քաղաքի»: Եւ արդարեւ, Ներսէսի աքսորը ընդունելով 648 թուին, վեցամեայ տարագրութիւնից յետոյ վերադարձը ընկնում է 654 թուին երբարդէն վերջացնում է Խորակառոյց Եկեղեցու շինուածքն ամբողջապէս:

Տեսնենք այժմ, թէ Վաղարշապատու Կաթուղիկէն և կյաների վկայարանները մինչև Զուարթնոց Եկեղեցու հիմնարկութիւնը որպիսի զրութեան մէջ Էին և քանի անգամ էին վերանորոգուել: Պատմութիւնից յայտնի է, որ Հայերս աղղովին քրիստոնեայ դարձանք 301 թուին Կոյսերի վկայարանների և Վաղարշապատու և Կաթուղիկէի կառուցումն, որ մեր դարձի հետ սերտ կապ ունի ըստ Աղաթանգեղոսի՝ 303 թուից յետոյ պէտք է որ չըլինի: Սեբեսու պատմութիւնից գիտենք (եր. 88—89), որ ս. Լուսաւորչի ու Տրդատի շինած ա. Հռիփսիմէի վանքը վերանորոգուել է Ե. դարեւ սկզբին՝ ս. Սահակ պարթևի օրսվ և վերաշննուել ու ընդարձակուել է Կումիտաս կաթուղիկոսի ձեռքով (617—

625 թ.): Նոյն կումիտասոր, ըստ Աերեոսից վերանորոգել է ս. Կաթուղիկէն (Էջմիածինը), կարկատելով որմերի խրամատները, փայտայարկ տանիքը փոխել է քարայարկի և շինել է սալայտատիկը: Նահիսամունեան կարծում է (Ստոր. ա. Հատեր. 18), որ Մեհրուժանը 380 թուին տւերել էր Վաղարշապտայի Կաթուղիկէն էլ որը Պապի թագաւորելուց յետոյ նորոգեցին Վահան Մամիկոնեանի նախնիքը: ոյս առաջին նորոգութիւնն է. երկրորդ նորոգութիւնը եղել է Վահան Մամիկոնեանի ձեռքով, Վարդանանց պատերազմի աւերմունքից յետոյ, Ե. Դարի երկրորդ կէսին, 483 թ. (Վաղար Փարպեցի 22. Աերեոս դլ. ա. եր. 25. Ասողիկ բ. Հանդէս, եր. 81-82). Երրորդ նորոգութիւնը՝ արդէն Կոմիտասի օրով 618 թ. էր. Նոյն ինքն Ներսէս Գ. ևս նորոգութիւններ է արել Կաթուղիկէում: որ Համարելի է չորրորդ նորոգութիւն: Եզր կաթուղիկոսը (630 թ.) վերաշինում է ս. Գայիանէի վկայարանը (Նահիսամունեան Հատ. ա. եր. 237):

Արդ, երբ Ներսէսի մերձաւոր նախորդները եռանդով նորոգում ու վերաշինում էին Վաղարշապտայի Կաթուղիկէն ու ս. Կոյսերի վկայարանները, Ներսէս Նինողը փոխանակ արդէն վերաշինուած ու նորոգուած Կաթուղիկէում բնակութիւն Հաստատելու, Կաթուղիկէից չորս վերատ հեռու, մի առապար տեղում հոյակապ եկեղեցի է կառուցանում: բնակարան հաստատում: որ Վաղարշապտայի եկեղեցիների մօտ լինի: Մի պատճառ, որ շատ թոյլ է և Յովհաննէս պատմարանից շատ լաւ բնորոշուել է «զեղիցիկ իմն մոլութիւն» կոչուելով: Եւ այս թոյլ պատճառով կառուցուած եկեղեցին մի անգամ այրուելով ամսյանալուց յետոյ էլ չըմերաշինուեց:

Այս ամենից երեսում է, որ Զուարթնոց եկեղեցու հիմնարկութիւնից շատ առաջ Վաղարշապտայի եկեղեցիքը կային և երեք չորս անդամ նորոգուել էին: Ընդունելով Վաղարշապտայի եկեղեցիների շինութիւնը 303 թուին, իսկ Զուարթնոց եկեղեցունը 641—648 թ. ուրեմն Վաղարշապտայի եկեղեցիքը Զուարթնոց եկեղեցուց մօտ 340 տարի առաջ են, և այդքան ժամանակ էլ առաջ այսինքն ս. Լուսաւորչի օրից սկսած, յայտնի էին Կաթուղիկէն՝ շինուած Վաղարշապտայի

կենտրոնում Արքունի ապարանքին մօտ ս. Լուսաւորչի տեսլեան տեղը՝ վկայարանները՝ շինուած Վաղարշապատի արեւելեան և հարաւային պարսպից դուրս, ս. կոյսերի նահատակութեան տեղը: Անհնարին է յեղաշրջել իրողութիւնը, երբ մանաւանդ նրան հաւասարացնող յիշատակարանները կանգուն են:

Բ.

Զուարքնոց եկեղեցին Երազմոյն եւ այլ աստուածների մեհեանը չէ եղել, եւ այդ մեհեանը քիստոնէական տանարի չէ փոխուել ի դէմս Զուարքնոց եկեղեցու.

Ըստ մեզ՝ Երաղմոյն մեհեանը Վաղարշապատից հեռու, Արտաշատի մօտ պէտք է լինին եթէ չասենք Երաղմոյն մէջուրեմն ոչ մի առընչութիւն չըկայ Երաղմոյն մեհեանին Վաղարշապատի արքունի ապարանքի (որի մօտ տեղի ունեցաւ ս. Լուսաւորչի յայտնի տեսիեքը) և ս. Էջմիածնի մէջ: Ազաթանգեղոս ասում է, որ Տրդատը Վաղարշապատում նահատակութ կոյսերի վերայ, նրանց նահատակութ տեղը, երեք վկայարաններ շինելուց և ս. Լուսաւորչի տեսիլը տեղը որմնափակ անելուց յետոյ՝ ս. Լուսաւորչի հետ զնում է Արտաշատ քաղաքը, այնտեղ եղած Անահտի քաղինը, որ Երազմոյն էր կոչւում, քանիդելու համար: Ճանապարհի վերայ (երեկի քաղաք մտնելիս) առաջին պատահած Երաղացոյց, Երաղնդհան մեհեանն է քանդում, որից գեերը հեծելազօրքի կերպարանքով Անահտի բադինն են ապաւինում: (Ազաթ. եր. 282—287):

Ըստ Ազաթանգեղոսի՝ Երաղմոյն մեհեանը նոյն Անահտի բագինն է, որ Արտաշատումն էր. իսկ Երաղացոյց, Երաղնդհան մեհեանը եթէ նոյն Երաղմոյն մեհեանը չէ, այնու ամենայնիւ աւելի Արտաշատին էր մօտ քան Վաղարշապատին. որովհետեւ գեւերը այնտեղից դուրս գալով մօտակայ Անահտի բագինն են ապաւինում: Բաց յայսմանէ, եթէ Երաղմոյն մեհեանը Վաղարշապատի մէջ տեղում լինէր, էլ ի՞նչ հարկ կար Ազաթանգեղոսին ասելու, թէ Տրդատը ս. Լուսաւորչի

հետ գնաց Արտաշատ, այնտեղ Անահտի մեջեանը քանդելու և ճանապարհին նախ—ղիպեալ՝ քանդեցին Երազմոյն մեջեանը. այլ կասէր. Տրդատ և ս. Լուսաւորիչ քանդեցին Վաղարշապատի մէջ՝ ապարանքին մօտ եղած, Երազմոյն մեջեանը և ապա գնացին Արտաշատ։ Ապարանքին մօտ, ուր տեղի ունեցաւ Կաթուղիկէն կերպարանող լուսոյ կամարների տեսիլքը՝ Երազմոյն մեջեանի անուն յիշատակուած չըկայ, որովհետև Երազմոյն մեջեանը Արտաշատին մօտ էր, և Զուարթնոց եկեղեցու տեղը քաղաքից չորս վերստ հեռաւորութեամբ գէպի արևելք առապար անապատում գտնուելով չէր կարող Լուսաւորչի յայտնի տեսիլքի տեղը լինել. ուրեմն բոլորովին մտացածին և անհեթեթութիւն է հաւատալն ու հաւատացնելը, թէ Խանդարած եկեղեցին Երազմոյն մեջեանն է, ս. Լուսաւորչի ձեռքով, իւր տեսիլքի համեմատ, քրիստոնէական տաճարի վերածուած՝ քահանայապետութեան Աթոռ և Հայոց բոլոր Մայր եկեղեցիների լինելու համար։

Զուարթնոց եկեղեցու տեղը Երազմոյն մեջեանը լինելուն իրեւ ապացոյց համարում են Զուարթնոց եկեղեցու աւերակիներում գտնուած սեպագիր արձանագրութիւնը։

Զուարթնոց եկեղեցու աւերակիների պեղման ժամանակ, յիրաւի, գտնուել է այնտեղ հիւսիսային դրան մօտ 47 տողից բաղկացած սեպագիր մի արձանագրութիւն, որ կոթողի ձեռնի։ Հ. Խաչիկը (1900 թ. Օգոստոս-Սեպտ. Արարատում, երես 381) այսպէս է նկարագրում այդ կոթող արձանագրութիւնը. «Քարը՝ որձաքար. մեծութիւնը-երկայնութիւնը 3 արշ. 14 վերշոկ, լայնութիւնը 14 վերշոկ, հաստութիւնը 8 վերշոկ. 23-24 տողերի մէջ տեղից կոտրուած։»

Մինչեւ այսօր սեպագիր արձանագրութիւններ գտնուել են վորագրուած կամ ժայռերի և կամ պարիսպների շարքի քառամնկիւնի քարերի վերայ. գտնուել է և սանդալեւ փորուած մի քարի շրթան շուրջը պատող մի արձանագրութիւն. բայց ոչ երբեք այն դիրքով, ինչպէս գտնուել է Զուարթնոց եկեղեցում։ Այդ կոթողը, որ իւր նախկին տեղում խաջքարի պէս իւր պատուանդանի վերայ կանգնած պէտք է լինէր, Զուարթնոց եկեղեցում որպէս հասարակ քար դրուած է եղել հիւսիսային

դրան վերայ՝ իրրեւ բարաւոր, երեսն ի վայր՝ ապացոյց—կոթողի երկու ծայրերի վերայ մնացած կրազանգի հետքը:

Այս սեպաձեւ արձանագրի պատուանգանը չի գտնուել եկեղեցում, կամ նրա շուրջը՝ որպէս զի հնար լինի ասեր, թէ արձանագրութիւնը կապ ունի եկեղեցու տեղի հետ: Պ. Բասմանձեանը ասում է. «Հակառակ բոլոր ջանքերուս և խուզարկութիւններուս՝ կարելի չեղաւ գտնել կոթողի պատուանգանը...»: Բայց կարող եմ բացարձակ կերպով յայտնել թէ կոթողը տարուած է հոն կուտուրլի գաւառէն, եթէ նոյն խոկ այնտեղ չէ այս անծանօթ գաւառի տեղը» (Բանասէր Հատ. երրորդ, պրակ ա. եր. 34): Սեպազիր արձանագրութիւնը վերծանող պ. Բասմանձեանը զրում է. «Այս արձանագրութեան մէջ յիշուած երկիրը—կուտուրլի—կարծիքով պէտք է լինի Մասիսի ստորոտում լեռնային Խութուրլու դիւզը և իլդարունի գետը պէտք է լինի Սև ջուր».... (Արարատ, Ապրիլ 1901 թ. եր. 225—226):

Պ. Բասմանձեանի ենթաղբած Մասիսի ստորոտի կուտուրլի — Խութուրլու դիւզը և իլդարունի կամ Սև ջուր գետը Երասխի աջ կողմունն են, Սուրմալուի գաւառում: Զուարթնոց եկեղեցին Երասխի ձախ կողմում՝ Էջմիածնի գաւառում: առաջինքը՝ հին Մասեացոտն և երկրորդը Արագածոտն գաւառներում ուղիղ գծով իրարից մոտ 40 վերստ հեռից մէկը Երասխից հարաւ, միւսը՝ Երասխից հիւսիս:

Յովոէփ վ. Սանտաղձեան Բաղմավէպի մէջ (Յունվար 1901 թ.) այդ սեպազիր արձանագրութեան հետ իւր վերլուծութիւնը դնելով՝ Պ. Բասմանձեանի «կուտուրլու»-ն «Քուիրզակ կարդում» (առլ 6), խոկ իլդարունի-ն «Դանանիասու»: Ինչ որ պ. Բասմանձեանը գետի անուն է՝ համարում, Յ. վ. Սանտաղձեանը «Դանանիասու», ծանօթութեան մէջ «արքայիկ մը» է կոչում: Պ. Բասմանձեանը «կուտուրլին» որպէս վայր և իլդարունին որպէս գետ ենթաղբում է Երասխի աջ կողմը, Մասիսի ստորոտում: Խոկ Յ. վ. Սանտաղձեանը ենթաղբում է, որ Քուիրզակ Գեղամայ ծովի հարաւարեմտեան կողմն է, և եղբակացնում է. «Թերեւ կոտայքը գաւառին նախնաւոր անունն Քուիրզակ էր»:

ի գեղ ասենք, երկու սեպագրագէտների ընթերցուածներն իրար համեմատելով՝ աւեսնում ենք որ միայն առաջին չորս առղերն են նման. այնուշետեւ թէ ընթերցմունքը և թէ թարգմանութիւնները աարբերւում են, պահելով միայն բովանդակութեան ընդհանուր իմաստը: Երկու սեպագրագէտների ընթերցմունքից եւ թարգմանութիւններից որն է ուղիղ և ո՞րը սխալ՝ մենք ձեռնհաս չենք դատելու, բայց հակամէտ ենք ընդունելու, որ սեպագիր արձանագրութեան սկզբնական տեղը Զուարթնոց եկեղեցին չէ. այդ սեպագիր կոթողը ուրիշ տեղից է բերուել ու Զուարթնոց եկեղեցում գրուել: Այդ ուրիշ տեղը ո՞ւր է՝ Մասսի ստորոտում թէ Գեղամայ լեռների հարաւային արևմտեան լանջերին, այդ խնդիրը թող լուծեն բեւեռազրադէաները:

Հայ բանասէրներից ու հնախօսներից ոմանք առհասարակ ձգտում են առ ընչութիւն աեսնել հին և նոր անունների մէջ. մեր կարծիքն է՝ չը հրապուրուել. հին և նոր անունների պատահական նմանութիւնը երբէք հիմք չէ կարող ծառայել նոյնացնելու նոյն անունները խնդրելի առարկայի նկատմամբ: Քուիրզան, որ կարող էր գոյութիւն ունենալ Քրիստոնից առաջ և. գարում կարելի է ոչ մի առնչութիւն չունի Կոտայքի հետ, և ոչ Կուտուրլին այժմեան Խութուրլիի հետ:

Պ. Բամաձեանը «Բանասէրի» յիշուած աետրակի մէջ, խօսելով Զուարթնոց եկեղեցու աւերակներում գանուած սեպագիր կոթողի երեալու մասին՝ գրում է. «Անկէ յետոյ բոլոր թերթերն հրատարակեցին այս լուրը զանազան տեղեկութիւններ տուին պեղումներու վերայ, և մինչև իսկ չափազանցեցին ամեն բան ու կամայական—չասեմ երեակայական—մեկնութիւններ տուին գտնուած բեւեռազրի մասին: Ես այսօք չը պիտի զբաղիմ այն հարցերով թէ, իրօք գտնուած են ո, Գրիգոր Լուսաւորչի նշխարները Զուարթնոց եկեղեցւոյ հիմերուն տակէն և թէ այնտեղ եղած է նախկին Աջմիածինը և կամ՝ Ագաթմանդեղոսի (Ճ.): Երազացոյց երազնդհան պաշտաման Տիւր դից զպրի մեհեանը: Այս հարցերու մասին պիտի զրեմ «Բանասէրի» յաջորդ պրակներէն միոյն մէջ:

—Մենք չը գիտենք՝ որ Բամանձեանը կատարեց իւր խոստումը թէ ոչ, որովհետեւ Բանասէրի յաջորդ պրակները ձեռքի տակ չունինք։ բայց սոյն ընդօրինակութիւնից ևս յայտնի երեսում է, որ նա կասկածով է վերաբերւում և տարածուած ու հրատակուածները չափազանցեցրած, կամայական և երեակայտական մեկնութիւններ է համարում։

Գեր. Տ. Մեսրոպ արքեպիսկոպոսը զանազան տեղերից տասնեակ սեպագիր արձանագրարեր է բերել և էջմիածին։ Այժմ այդ քարերը ս. էջմիածնում տեսնելով ինչպէս չենք կարող ասել, թէ դրանք չենց իրանց սկզբնաւորութեան առաջին օրից էջմիածնումն են դրուել, և ինչպէս անհնարին է ս. էջմիածնին վերագրել արձանագրութիւնների մէջ յիշուած դէպքերը, այսպէս և չենք կարող ասել, թէ Զուարթնոց եկեղեցու մօտ գտնուած սեպագիր արձանագրութիւնը սկզբում այնտեղ է կանգնած եղել և այդ տեղը որ և է առընչութիւնունի մեր հեթանոսական ժամանակի Տիւր դից, Երազմայն, Երազընդհան և Երազացոյց չաստուածների մեջեանների հետ, որովհետեւ այդ չաստուածների մասին արձանագրութեան մէջ յիշատակութիւն չըկայ և, ինչպէս ապացուցուեց, Խանդարած կամ Զուարթնոց եկեղեցում գտնուած սեպագիր արձանագրութիւնը ուրիշ տեղից է ընթառել այնտեղ։

Գ.

Զուարթնոց եկեղեցու սիւների տակ չէր կարող դրուել
Ս. Լուսաւորչի մարմինը եւ չէ դրուել։

Խաչիկ Հայրսոուրբը հիմք ունենալով Դրասիանակերտցի Յովհաննէս կաթ. պատմաբանի աւանդածը, սկսեց Զուարթնոց եկեղեցու չորս հաստահեղոյս սիւներից մէկը քանդել մինչեւ հիմքը՝ ս. Լուսաւորչի մարմին մասն այնտեղ գտնելու նպատակով։ Քանի անդամ առիթ ունեցանք ասելու, որ նա զուր աշխատանք դործ չըդնի, որովհետեւ սիւների հիմքի տակ ս. Լուսաւորչի մասունք չըկայ։ Սակայն Խաչիկ Հայրսոուրբը յամառութեամբ շարունակում էր իւր դործը, կրկնելով. «Հնասէր»

ներին հետաքրքրութեան բաւական նիւթ տալուց յետոյ կամենում եմ հաւատացեալներին էլ պաշտամունքի առարկայ տալ։ Սիւնը փորուեց մինչև հիմքը, սակայն չըդանուեց այնտեղ ու Լուսաւորչի նշխարն ամփափազ և նրա նույիրականութեան պատշաճ մի տապանակ քարից կամ մետաղից։ յետոյ լուր տարածուեց, որ հողի մէջ ոսկըներ են գտնուած։ ուրիշների հետ Մայր Աթոռիս միաբան ծերունազարդ Եղիա վարդապետ Հասան Զալալեանն էլ, որի ուղղամութեան, իրօնասիրութեան և անաշառութեան մասին ոչ ոք կարող է կասկածել, զնում է քանդուած սիւնի հիմքը տեսնելու, և տեսնում է հիմքում մանրամաղ տւազախտան հող։ Նա քըրըել է տալիս այդ հողը և այնտեղից դուրս է դալիս ոսկըների հետ և թռչունի կմախք։

Ահադին սիւնի տակ մայր գետինը ինչո՞ւ պէտք է մաղած հող լինի, եթէ նոր լցրած չեր. և Հ. Եղիան, իրան յատուկ պարզախօսութեամբ, ասում է. «Եթէ հողը նոր լցուած չէ և ոսկըները նոր զրուած չեն հողի մէջ՝ թըռչունի կմախքն ի՞նչ գործ ունի այստեղ։» Խաչիկ Հայրս սուրբը այլայլում է, բայց և պատասխանում. «Դրանք էլ ու Լուսաւորչի արծուի ոսկերոտիքն են։» Թռչունի ոսկըներից մի կտոր վեր է առնում Հ. Եղիան, իսկ գլուխը պահում է Հ. Խաչիկը։

Մենք միայն Հ. Եղիայի անունն ենք տալիս. որովհետեւ ուրիշների տեսածն ու նկատածը անձամբ չենք լսել, հետեւաբար և իրաւունք չենք համարում նրանց անուները տալ։ Յանկալի էր, որ ուրիշներն էլ իրանց տեսածը հրատարակեն՝ որով և ճշմարտութիւնը վերականգնած կըլինին։

Մենք ի նկատի ունենալով Հ. Խաչիկի կոչումն՝ յանցանք կը համարենք կարծելն անգամ։ թէ նա ուրիշ տեղից ոսկըներ բերած ու լցրած լինի սեան հիմքի խորութեան մէջ. եթէ ենթաղընք, թէ նա արել է այդ բանը, գոնեա այնքան հեռատես կըլիներց որ թռչունի ոսկըները կը ջոկէր նախապէս և միայն մարդկային ոսկըներ կըդնէր։ Ուստի և հակամատ ենք կարծել ու հաստատ համոզուած ենք, որ մի նենգաւոր և չարածմի մարդ, տեսնելով Հ. Խաչիկի անզուսպ ցանկութիւնը

գտնելու ու Լուսաւորչի մասունքը սիւնի հիմքում խաղ է խաղացել նրա գլխին՝ հիմքի տակ մաղած հող լցնելով և հետն էլ մարդու ու թռչունի ոսկրներ, որ լաւ եւ ծաղրէ նրան։ Անշուշա, հաղարաւոր տարիների ընթացքում աշաղին մեծութեան սիւնի և նրա վերայ ծանրացող մեծամարմին եկեղեցու տանիքի ու գմբէթի ճնշման տակ գետինը փուխը չեր մնայ՝ տոկորուած լինելով նաև շինութեան ժամանակ սուզուած կրախառն ջրով։ Ցիրուի հասահեղոյս սիւնի հիմքում ի՞նչպէս կարող է մանրամաղ փուխը վոշի լինել, ով աւազի վերայ հիմք կըդնէ։ Ա. Լուսաւորչի մարմինը առանց կարեւոր նախահոգութեան հենց հողի մէջ շաղ տրուած կարող էր լինել. Ա. Լուսաւորչի ոսկրների հետ թըռչունի ոսկրներ ինչո՞ւ կը լինեին։ Ա. Լուսաւորիչը ի՞նչ արծիւ կարող էր ունենալ։ Անշուշտ խաղ է խաղացուած, անյայտ չարագործը մեծ որբասպղծութիւն է կատարել։ Մենք իջել ենք սիւնի բացուած հիմքի խորութեան մէջ, հողը թաց կոչուելու չոփ խոն աւ է, այդ թացութեան և խոնաւութեան մէջ չէին կարող 1260 տարի առանց կարեւոր նախահոգութեան ոսկրներ դիմանալ։ Եթէ ընդունենք, որ որբոց մասունքներին ապականութիւն չէ մերձենում; թռչունի ոսկրներն էլ որբի մասունք հօ չէին, որ նրանք էլ չըփակին։ —Ի յարդանս Խաչիկ Հայրասուրբի պէտք է խոստվանենք, որ ինքը Հ. Խաչիկնեւս համոզուելով՝ որ սիւնի հիմքի տակ Ա. Լուսաւորչի մասունք չէ եղել, իւր ստորագրութեամբ այս մասին ոչ մի յօդուած չունի, և պաշտօնապէս Սինօդին չէ յայտնել։ —Այժմ դառնանք Ա. Լուսաւորչի մարմինի զիւտի և տեղափոխութեանց պատմութեանը։

Ա. Լուսաւորիչը առանձնանալով՝ անյայտութեան մէջ Մանիա այրում վախճանեւում է։ Հովիւները այրի մէջ գանելով ս. Լուսաւորչի մարմինը, առանց իմանալու թէ ումն է, թաղում են։ Նատ տարիներ յետոյ, աստուածային յայտնութեամբ Գուռնիկ ճգնաւորը ս. Լուսաւորչի մարմինը հանում է Մանիա այրից, բերում Թորդան ու թաղում այնտեղ (Խորեն, զի՞քը թ. գլ. դա)։ Հանդ. Խորեն եպիս. Ստեփանին Խորենացու աշխարհարար թարգմանութեանը կցած

536 ծանօթութեան մէջ բաւական ընդարձակօրէն գնում է ս. Լուսաւորչի մարմնի գիւտի և տեղափոխութեան մանրամասնութիւնները։ Կա առում է, որ Զենոն կայսրը և դարում ս. Լուսաւորչի նշխարներից մի մասը թողնելով Հայաստանում՝ մնացած տեղափոխել է Կ. Պոլիս։ Հայաստանում մնացած մասը կտոր կտոր է, արուել, և թանկաղին քարերով ընդելուզուած տիերի մէջ դրուել ու բաժանուել է, իսկ Կ. Պոլիս տարուած մասը տեղափոխուել է Խտալիա և դրուել Կապօլի քաղաքի Քենեղիկտեան կրօնաւորների եկեղեցում։ Հանգուցեալ Ալիշանը իւր «Արշալոյ» և Արեւելք լուսաւորութեան Հայոց» յօդուածում (Յաղմավեպ նոյեմբ. 1901 թ. եր. 351) տռանց աղքիւր յիշելու, որպէս մի հասարակեալ ճշմարտութիւն՝ ասում է, որ Զենոն կայսրը ս. Լուսաւորչի մարմնը տանել է տուել իւր մայրաքաղաքը։ Պ. Կարտապետ Կոստանեանցը «Ա. Լուսաւորչի Աջը» Արարատից (1876 թ. հմբ. 5—6) արտատպուած իւր գրուածքի մէջ աւելի ևս մանրամասնարար է գրում ս. Լուսաւորչի նշխարների գիւտի և տեղափոխութեան մասին։ Պ. Կ. Կոստանեանցը յիշեալ գրուածքում ասում է. «Դեռ և. դարում ս. Լուսաւորչի նշխարները Հայոց եկեղեցու սրբութիւնների մէջ նշանառ տեղ էին գրաւում։ Կազար Փարսկեցին պատմում է, որ ս. Վարդանանց ժամանակ, երբ Հայոց նախարարներնը պարսից զո՞նից վերադարձան Հայաստան, նոցադիմաւորեցին «Դասք պաշտօնեիցն, բերելով ընդ ինքեանս զնշան կենսատու Խաչին և զնշխարս սրբոյ առաքելանման նահատակին Գրիգորի»։ Նմանապէս պատմում է, որ երբ Վահան Մամիկոնեանը իրբե Հայոց սպարապետ Պարսկաստանից Դուին եկաւ, Յովհաննէս Մանդակունի հայրապետը զիմաւորեց նրան «պատուական նշանաւ Խաչին և ս. Նշխարօք Ճ՛նազդեաց նահատակին Գրիգորի» (երես 20—30.)։

Պ. Կ. Կոստանեանցը այսպէս ապացուցանելով, որ և. դարում Վարդանանց ժամանակ (450 թ.), ս. Լուսաւորչի նշխարը որպէս նշանաւոր սրբութիւն ս. Խաչի հետ արգէն յարգւում էր, կարծում է, թէ Զենոնի Կ. Պոլիս տարածը ս. Լուսաւորչի նշխարի մի մասն կըլինէր, յայտնուած յունական բաժ-

նում, և յաւելացնում է. «Անբացարելի կը մնան այն աւանդութիւնները, որոնցից երեսում է, թէ Քիւզանդիայից բերուած են Հայաստան ս. Լուսաւորչի նշխարները թ. գարում Աշոտ Ա. թագաւորի ժամանակ: Այսու ամենայնիւ մեղ համար հաւասարին այն է, որ Ե. գարում կային Վաղարշապատում և ապա Դուինում ս. Լուսաւորչի նշխարներ»:

Այնուհետեւ պ. Կոստանեանցը մէջ բերելով Կաղանակատուացու աւանդածը ս. Լուսաւորչի նշխարների վերաբերութեամբ՝ զրում է. «Այս եղաւ ներսէս Գ. Նինողի ժամանակ (632—671 թ.), որն և կանգնեց ս. Լուսաւորչի յիշատակի համար մի հոյակապ եկեղեցի, նրա աւերակներն այսօր ել կան Վաղարշապատի արեւելեան կողմը Երևանու ձանապարհի վերայ և կոչւում են Խանգարած եկեղեցի»:

Պ. Կ. Կոստանեանցը ամեն զգուշաւորութեամբ մէջ բերելով ս. Լուսաւորչի մարմնի տեղափոխութեան մասին աւանդուածը՝ երկու տեղ վրիպում է. Անատպացուցանելով, որ ս. Լուսաւորչի նշխարները Ե. գարից սկսած յայտնի էին և Հայրապետանոցի ուրիշ սրբութիւնների կարգում ս. Խաչի նշանի հետ առաջին տեղն էին ըռնում՝ միանգամայն հաւատում է և Մովսէս Կաղանկատուացուն, որ ասում է. «Իերեալ էր իշխանն և մեծ զօրավարն (Գրիգոր Մամիկոննեան) Հայոց ի Թորդանայ, ի Դարանաղեաց գաւառէն զպատուական նշխարս սըրոյն Գրիգորի ըոլորովին ամեն ոսկերօքն հանդերձ...» Խոկ Խորայէլ եպիսկոպոսի թալիսանձանքին, ըստ նոյն Կաղանկատուացու, կաթուղիկոսն ու զօրավարը պատասխանում են. «Եթէ ոչ ուրեք երբէք քաշխեալ են նշխարք սըրոյն Գրիգորի, եւ ոչ մեք ունիմք իշխանութիւն հանել ի նմանէ մասն եւ տալ քեզ» (Հատ. Բ. զԼ. 1.Բ), որից հետեւում է, թէ ս. Լուսաւորչի նշխարները գեռ մաս մաս բաժանուած չէին. որ ի հարկէ յայտնի հակասութիւն է Զենոնի Լուսաւորչի նըշխարները Կ. Պօլիս տանելու աւանդութեանը և Ղաղար Փարպեցու պատմութեան խկութեանը, թէ Հայրապետանոցում կար ս. Լուսաւորչի նշխարը: Բ. պ. Կ. Կոստանեանը ընդունում է, ս. նշխարների Վաղարշապատ տեղափոխուելը ներսէս Գոհի օրով, և նոյն ներսէսի ձեռքով ել սների տակ դրուե-

լը. մինչդեռ Կաղանկատուացին, ինչպէս ցոյց է տալիս ս. նըշաբարների մասին գլխակարգութիւնը (Հատ. թ. զլ. 1. լ.), ս. նշխարների տեղափոխութիւնը դնում է Սահակ Զորափորեցու օրով, որ դահակալեց 677—703. իսկ ներսէս Գ., ինչպէս տեսանք՝ 641—661 վարելով իշխանութիւնը, վաղուց վախճանուած էր, ուրեմն և չէր կարող իւր մահից մօտ 20 տարի յետոյ բերուած նշխարը իւր մահից մօտ 20 տարի առաջ հիմնարկուած եկեղեցու հիմքի տակ դնել:

Որովհետեւ ս. Լուսաւորչի նշխարներն ըստ Փարպեցու արդէն և. դարից գտնուում էին Հայրապետանոցում, ուրեմն Կաղանկատուացու գրելը, թէ «բերեալ էր զպատուական նըշխարս սրբոյն Գրիգորի ըոլորովին ամեն ուսկերօքն հանդերձ», և թէ «ոչ ուրեք երթք բաշխեալ են եւայն»՝ հակառակ է պատմութեան և կասկածելի: Որովհետեւ Կաղանկատուացին նշխարների Թորդանից բերուելը դնում է Գրիգոր Մամիկոնեանի միջոցով Սահակ Զորափորեցու օրով, որ Զուարթնոց եկեղեցու հիմնարկութիւնից մօտ 35 տարի յետոյ Հայրապետուացաւ, ուրեմն և Յովհաննէս կաթուղիկոսի զբոյցը, թէ ներսէս Նինողը ս. Լուսաւորչի մարմինը չորսի բաժանելով դրեց եկեղեցու չորս հաստահեղոյս սիւների հիմքում՝ բոլորովին հերքուում է. վասն զի, անհնարին ինչ է 40 տարի յետոյ բերուած ս. նշխարները դնել 40 տարի առաջ կառուցուած եկեղեցու սների հիմքի տակ և այս գործողութիւնը կատարուած համարել հիմնարկութեան ժամանակ:

Ս. Լուսաւորչի նշխարների է. դարում Վաղարշապատ բերուելն ու Զուարթնոց եկեղեցում զբուելը յիշւում է Ժ. դարից սկսած, այսինքն Զուարթնոց եկեղեցու հիմնարկութիւնից մօտ 250 տարի և աւերուելուց մօտ 150 տարի յետոյ. և յիշողներն են ա. Յովհաննէս պատմարան, որ վարում էր իւր Հայրապետական իշխանութիւնը 897—924 թիւը. բ. Մովսէս Կաղանկատուացին, որ ըստ մեզ՝ Ժ. դարի, իսկ ըստ Հանդ. Գ. Զարբանալեանցի (Պատմ. Հայ Դպր. Դ. Ժ. դար) է. դարի պատմիչ է*). գ. Վարդան վարդապետ

*) Ծանօթ: Զարբանալեանը կարծում է, որ Կաղանկատուացուն վերագրուած պատմութեան ը. Հատ. Խե. գլխից յետոյ շարանցիմքեր-Դեկտեմբեր

(Հատուած կից Սեբեռսի, Հրատ. Ք., Պատկանեանի գ. յաւելուած եր. 56): Պատմիների ժամանակագրութեան կարգով դնենք նրանց աւանդածը ս. Լուսաւորչի նշխարները Զուարթնոց եկեղեցում դրուելու մասին:

Ա. Մովսէս Կաղանկատուացի (Ենթագրենք Է. դարի պատմիչ) ասում է. «Ի ժամանակս այնոսիկ (Խրայէլ եպիսկոպոսի Այրարատ գալու ժամանակ Սահակ Զորափորեցու և Գրիգոր Մամիկոնեանի օրով) բերեալ էր իշխանն մեծ և զօրավարն Հայոց ի Թորգանայ ի Դարանազեաց դաւառէն զպատուական նշխարս սրբոյն Գրիգորի բոլորովին ամենայն ունկերօքն հանդերձ յաշխարհս Հայոց յԱյրարատեան դաւառն ի Վաղարշապատ քաղաք և հանգուցեալ ի նորաշէն յարկս եկեղեցւոյն զոր մեծին ներսիսի շինեալ էր յանուն սրբոյն Գրիգորի» (Հատ. Բ. գլ. 1.Բ. եր. 187. Մոսկ. 1860): Այս հատուածից երեւում է, որ նշխարները Թորդանից բերուելով, — եթէ երբէք այդ բանը տեղի է ունեցել, — դրուել են ի յարկս եկեղեցւոյն և ոչ սիւների տակ, և եկեղեցու այրուելու կամ ամայանալու ժամանակ կարող էին այրուել կամ տարուել ուրիշ տեղ ու անհետանալ: Կրկնում ենք, Կաղանկատուացու աւանդածից երեւում է, որ ա. նշխարները դրուել են արդէն շինած եկեղեցու յարկում և ոչ շինուելիք եկեղեցու հիմքի մէջ:

Բ. Յովհաննէս կաթուղիկոսը ըլ յիշելով, թէ որտեղից բերուեցին ս. Լուսաւորչի նշխարները, գրում է. «Խոկ ի հիմնարկել զաւտուածակերտ փարախն բանաւոր հօտին Քրիստոսի ի ներքոյ չորից սեանցն հաստահեղուսիցն բաժանեալ դնէ զնշխարս ոսկերաց սրբոյն Գրիգորի, առ ի յանշուշտ մնացականութեամբ պահիլ դանձոյն երկնաւորի ի գերչաց ասպականչաց, և ի պարծանս հաւատոյ քրիստոնէական կարգաց: Խոկ զքրիստոսազրոշմ և զպատուական գլուխն ոչ ի խորոշ,

յարել է Ժ. դարում Մովսէս Դասխուրանցի: Գել. Տ. Մակար եպիսկոպոս Բարխուդարեանցը իւը Պատմ. Ազուանից գրքի ա. հատորում երկրորդելով Հ. Զարբանալեանի կարծեքը, ասում է, որ Երկու Մովսէսների անուան նոյնութիւնից շփոթութիւնն է առաջացել և Դասխուրանցու շարունակութիւնն էլ վերագրուել է Կաղանկատուացուն:

այլ արտաքոյ ի գղբոցի եզեալ՝ զնէ ի դանձարանս աստուածութեան ի յոյս բարեաց փափագողաց նմա և ի բժշկութիւն ախտացելոց» (Յովհ. կթզ. Երուս. 1843 թ. եր. 59): Այս հասուածից երեւում է, որ ներսէս Շինողը ո. Գրիգորի նշխարքը չօրսի բաժանելով եկեղեցու հիմնարկութեան ժամանակ զրել է չորս հաստահեղոյս մների հիմքի տակ: իսկ զլուխը՝ գղբոցի մէջ դուրսը ուխտի համար: Արդ, եթէ ըստ կաղանկատուացու Գրիգոր Մամիկոնեանը Սահակ որափորեցու օրով, 677 թուից յետոյ, Թորդանից բերեց ո. Գրիգոր Լուսաւորչի նշխարքը, ներսէս Գ. 641—648 թ. եկեղեցին հիմնարկելիս՝ նշխարների տեղափոխութիւնից մօտ 40 տարի առաջ, ի՞նչպէս կարող էր եկեղեցու հիմքում դնել, ակներևան հեթեթութիւն: Ի նկատի ունենալով որ Յովհաննէս պատմարանը իրանից առաջ եղած անցքերը պատմագրերից ընդօրինակում է քան շարադրում: և ներսէս Գոհ անցքերը դրեմիս նրա աղբիւրն էր Աերենոսը, ուր այդպիսի բան չըկայ, Մայր Աթոռոյս միաբան՝ ձեռագրերի և հայ գրականութեան բազմահմտւած Սահակ վարդապետ Ամատունին կարծում է, որ այդ յաւելուածը յետին ժամանակի գործ է: Այդ տեսակ յաւելումներ գրիշները թոյլ էին տալիս իրանց: օրինակ, Երուսաղէմում տպածի «Այս եղեւ սկիզբն ժամատան շինելոյ, մինչեւ ցայս վայր ոչ երեխւր ի հայս: ձեռագրերում և ուրիշ տպադրութիւնների մէջ չըկայ: Եւ յիրաւի: Յովհաննէս պատմարանը համարեա բառացի կերպով կրկնում է Աերենոսի աւանդածը ո. Նոխիսիմիկի տապանի երեման մասին (Յովհ. կթզ. Երուս. եր. 52). չի շեղւում նա Աերենոսի աւանդած կարգից Զուարթնոց եկեղեցու պատմութիւնն անելիս՝ թէ հիմնարկութեան և թէ Շինողի վեցամեայ տարագրութիւնից յետոյ շարունակութեան վերաբերութեամբ (եր. 59 և 62): Եթէ Յովհաննէս պատմարանի աղբիւրն էր Աերենոսը՝ Աերենում հիմնարկութեան ժամանակ ո. նշխարների մների տակ դրուելու մասին խօսք չըկայ: Արդ, Յովհաննէս կաթուղիկոսը որ տեղից հնարեց այդ, քանի որ իրանից առաջ եղող Վեռնդ պատմագրի մէջ ևս այդ հատուածը չըկայ: Պարզ երեւում է, որ արդարեւ այդ ամբողջ հատուածը յետին ժամանակի

գործ է. իսկ եթէ իւր իսկ զրածն էլ է, անհիմն է, որովհետևհակառակ է պատմական ցուցմունքներին և ժամանակադրութեանը:

Գ. Ստեփաննոս Ասողիկ(թ. Հանդէս, թ. գլ. եր. 82) գրում է. «իսկ յաւուրս Վահանայ յայտնեցաւ նշխարք ս. Առաքելոյն Թաղէոսի և Սանդխառոյ և սրբոյն Գրիգորի Լուսաւորչին մերոյ»: Վահանը Գրիգոր Մամիկոնեանից 200 տարուց աւելի առաջ էր, եթէ Վահանի ժամանակ յայտնուեց ս. Լուսաւորչի նշխարքը՝ Գրիգոր Մամիկոնեանը 200 տարի յետոյ Թորդանից էլ ինչ բերեց, որ ինչ դրուեր Զուարթնոց եկեղեցու յարկում կամ նրա սիւների տակ:

Դ. Սամուել Անեցին գրում է. «ՆՊ. Եղիս Գառնիկ
երանելի զնշարս ո. Գրիգորի ի Մանեայ այլն, և հանգու-
ցին ի Թորդան»: — Վաղուց արդէն գտնուած էր:

Ե. Վարդան վարդապետ (Սերեսոսի յաւելուած հրատ.
Ք. Պատկանեանցի եր. 56) կրկնելով ս. նշխարների՝ սիւների
հիմքում դրուելու մասին, զբոյցը՝ ասում է. «Եւ զսուրը
Գրիգորի նշխարն ասեն բերեալ ի Հայս Գրիգորոյ Մամիկո-
նենց ի գնալն նորա դեսպան ի Կ. Պօլիս՝ տուեալ ցնա կին
ոմն յաւագաց, որ ունէր առ իւր։ Եւ նորա գաղտ հանեալ
ի ծով և անցեալ գայ բերէ անգիտելի քաղաքին զգանձն
անանց մեծութեան։ Եւ զծնօտն տայ Աղուանից ի խնդրոյ
Զիւանշիրի և քեռ իւրոյ, որ էր կին Գրիգորի։ Ծնօտի պատ-
մութիւնը առնուած է կաղանկատուացուց։ Բայց կաղանկա-
տուացու հակառակ՝ ս. նշխարների փոխաղրութիւնը փոխա-
նակ Թորդանից դնելու, կոստանդնուպօլիսից է դնում։ Հակա-
սութիւնները միմիանց հերքելով հաստատում են Ղաղար
Փարպեցու ասածը, թէ ս. Լուսաւորչի նշխարը հայրա-
պետանոցի սրբութիւններից առաջինն էր, որ մնացել էր
Հայաստանում Ե. դարից սկսած, այդ նշխարը ս. Լուսա-
ւորչի Աջն է, որ անկապտելի գանձն է հայրապետանոցի, և
բացի այդ գանձից նշխարների մասին մնացեալ զբոյցները
անհեթեթ առեղծուածներ են։ Այդ առեղծուածը Շմարտու-
թիւն են համարել յետին պատմիչները և առանց քննելու
կրկնել են Յովհաննէս պատմութանի զբոյում եղածը թէ ս. Լու-

սաւորչին նշխարները ներսէս Գ. գրել է իւր կառուցած Զուարթնոց եկեղեցու սիւների հիմքի տակ՝ հիմնարկութեան ժամանակի։ Այդպէս է վարուել Յովհաննէս եպիսկոպոս Շահիսամունեան, Աքէլ եպիսկոպոս, վարուել ենք մենք (Եկեղ. պատմ. տպ. ս. Էջմ. 1884 թ.) և այլք։ Այժմ խելամտելով և պատմութեան զանազան պարագաները աչքի առաջ ունենալով՝ տեսնում ենք որ սիսալուել ենք. ուստի այս յօդուածով ուզզում ենք մեր սիսալը։

Զ. Հանգուցեալ Ալիշանը Զուարթնոց եկեղեցու պեղումներից դեռ 11 տարի առաջ 1890 թուին հրատարակած իւր «Այրարատ» տեղադրութեան մէջ, առանց կանխակալ կարծիքների, իրան յատուկ զգուշաւորութեամբ գրում է. «Կարծես մի սիսալ կայ այս խօսքերի (Յովհաննէս պատմագրի) մէջ. նախ որ առաջին և ժամանակակից պատմիցը (Եւսեբեոս) երկնաւոր Զուարթունների անունով է կոչում եկեղեցին, և երկրորդ, ներսէսի ժամանակ դեռ եւս չէին ըերուել Այրարատ ս. Լուսաւորչի նշխարքը»։ (Եր. 245. էջ թ.): Մենք դիտմամբ աշխարհաբար թարգմանուած մէջ բերինք Հ. Ալիշանի խօսքերը որ ամենքին հասկանալի լինեն։

Է. Պ. Կ. Կոստանեանցը ս. Լուսաւորչի նշխարների Բիւղանդիայից տեղափոխութիւնը ըստ աւանդութեան՝ դնում է. Թ. դարու. Տ. Աշոտ ա. թաղաւորի օրով։ — Եթէ Թ. դարում տեղափոխուեց Բիւղանդիայից ս. Լուսաւորչի նշխարք, ուրեմն սիսալ է Կաղանկատուացու ասելլը, թէ Գրիգոր Մամիկոնեանը Թորդանից բոլոր նշխարները սոկերուեօք հանդերձ բերեց Վաղարշապատ, որովհետեւ ս. նշխարները պէտք է որ Ե. դարի վերջերին Զենոն կայսրի օրով Կ. Պոլիս տարուած լինէին. սիսալ է և Յովհաննէս կաթուղիկոսին վերագրած խօսքը, թէ նշխարները չորսի բաժանելով՝ ներսէս Շինողը է. դարում դրեց իւրակառոյց եկեղեցում հիմքի տակ։

Ը. Բարձր. Կարապետ վարդապետ Տէր-Մկրտչեանն և Արարատում (Նոյեմբեր-Դեկտեմբեր 1901 թ.). Մի հարևանցի նկատողութիւն՝ յօդուածի մէջ ընդունում է ս. Լուսաւորչի նշխարների Ե. դարում յայտնի լինելլը, ուստի և ասում է. «Անհաւանական չէ, որ արդէն սուըբերի կարդն անցած Լու-

առարջի հետ գաղափարական կապ պահպանելու համար Գիւտի ժամանակից սկսեցին Հայոց կաթուղիկոսներն իրենց մօտ պահել ս. Լուսաւորչի նշխարները, և այդ նշխարները զրուեցան առաջին անգամ այն եկեղեցու հիմքում, որ ս. Գրիգոր կոչուելով պէտք է այնուհետև հայրապետական Մայր եկեղեցի՝ «Կաթուղիկէ» լիները Յամենայն գէպս, կրկնում ենք, այս ս. Գրիգորն էր Դուինի եկեղեցին...» և, շարունակելով խօսքը Դուինի ս. Գրիգորի եկեղեցու շինութեան մտսին՝ Հայր Կարապետն ասում է. «Ամենայն հաւանականութեամբ այս և ոչ Վաղարշապատի «Զուարթնոց» եկեղեցուն է վերաբերում նաև պ. Կոստանեանցի յառաջ բերած յիշատակարանի այն տեղեկութիւնը, թէ Ներսէս Գ. Բիւզանդիոյ Կոստանդ կայսեր ծախքով շինեց «զբազմապայծառ փարախն բանաւոր հօտից ի Քաղաքուղաշտի ի սուրբն Գրիգոր»: Հ. Կարապետը պնդում է, որ Քաղաքուղաշտը այսուեղ պէտք է Դուին հասկանալ: Մի խօսքով Հ. Կարապետն էլ ընդունելով, որ Ե. դարում ս. Լուսաւորչի նշխարները յայտնի էին լոելեայն հերքում է Կաղանկատուացու և Վարդանի աւանդութիւնները ս. Լուսաւորչի մարմինի տեղափոխութեան մասին, և, չուղենալով հերքել Յովհաննէս կաթուղիկոս պատմաբանի զբքում եղածը, թէ ս. Լուսաւորչի նշխարները զրուել են Քաղաքուղաշտի ս. Գրիգորի եկեղեցու սների տակ Քաղաքուղաշտ համարում է Դուինը և ս. Գրիգոր համարում է Դուինի ս. Գրիգորը: Սակայն Դուինի ս. Գրիգորը ինչպէս աւանդում է պատմութիւնը, (Յովհ. պատմ. կթզ. եր. 41) շինուած է Ե. դարում Վարդան Մամիկոնեանի ձեռքով, Ներսէս Նինողից աւելի քան երկու հարիւր տարի առաջուրիմն Ներսէս Գ. շը լինելով կառուցանողը այդ եկեղեցու չեր էլ կարող նրա հիմքի տակ ս. Գրիգոր Լուսաւորչի նշխարները գնել: Ճշմարիտ է, Դուինի ս. Գրիգորը այրուեց պարսիկներից կաւատի որդի Խոսրով Թաղաւորի օրով (Սեր. գլ. ա.), բայց Խոսրովը թագաւորում էր ըստ Ասողիկ՝ (գլ. բ. եր. 83) Փըկի 527—575 թ., ըստ Ահօղեքէի (ող. Եղեան Ասողիկ 85 ծանօթութիւն) 531—579 թ.: Սերեսուը Դուինի ս. Գրիգորի այրուելը դնում է Խոսրովի թագաւորութեան 41-րդ

տարում: այսինքն Փրկչի 572 թ.: Գուինի ս. Գրիգորի վերաշնութիւնը Արքահամ կաթուղիկոսը (Սեբ. ծէ.) իւր հայրապետութեան վերջին տարիներին սկսեց և աւարտեց Եղբը (Սեբ. իդ. եր. 78): Այսպէս Գուինի ս. Գրիգորը վերաշինուել սկսուելով Ներսէսից 37 տարի առաջ, նրա նախորդի օրով արդէն աւարտուած էր: Այդ եկեղեցում եղաւ 648 թ. Դուինի ժողովը ընդդէմ Յունաց (Սեբ. գլ. եր. 119): Այդ եկեղեցում Բիւզանդիոյ կայսր Կոստանդինի Ներկայութեամբ Ներսէսը Հաղորդուեց յունածէս պատարագին և դահընկեց եղաւ (Սեբ. 1.Ե. եր. 141): Արդ, եթէ Դուինի ս. Գրիգորը, որ Ներսէս Գ-ի նախորդ Եղբի օրով արդէն վերանորոգուած վերջացած էր, էլ ինչպէս կարող է Ներսէսի ձեռքով և Կոստանդինի ծախքով ի հիմանէ շինուել. չէր էլ կարելի նրա, դարերով առաջ զրուած հիմքի տակ գնել ս. Լուսաւորչի նշխարները, որ, ըստ Կաղանկատուացու՝ Թորդանից բերուել էր Սահակ Զորափորեցու օրով 677 թուից յետոյ, այն ժամանակ՝ երբ Ներսէս Գ-ի մօտ 20 տարի առաջ վախճանուած էր:

Մեր կարծիքով Հ. Կարապետը մի սխալ ուղղել կամենալով ուրիշ սխալի մէջ է ընկել: — Ա. Լուսաւորչի նշխարը Դիւտ կաթուղիկոսից էլ առաջ յայտնի էր. Քաղաքուղաշար միշտ Վաղարշապատն է եղել և ոչ Դուինը. Ներսէս Գ-ի շինած ս. Գրիգորը (Կոստանդինի ծախքով) Վաղարշապատինն է և ոչ Դուինինը:

Հետաքրքիր է և ս. Լուսաւորչի մարտնի տեղափոխութեան պատմութիւնը. — Մովսէս Կաղանկատուացին ասում է (Բ. Հատ. գլ. 1.Բ.): որ Վարագ-Տրդատ իշխանը Գլխոյ վանքի Խորայէլ եպիսկոպոսին ուղարկում է Այրարատ Մեծ Հայրապետի (Սահակ Զորափերեցու) մօտ: Այն ժամանակ Հայոց մեծ զօրավարը (Գրիգոր Մամիկոնեան) Դարանաղեաց գաւառի Թորդան գիւղից Վաղարշապատ է բերած լինում ս. Գրիգորի նշխարները բոլոր ոսկեներով եւ հանգուցած Ներսէս Շինողի կառուցած նորաշէն եկեղեցում: Խորայէլ եպիսկոպոսը կաթուղիկոսից և Հայոց զօրափարից թախանչելով խնդրում է ս. Գրիգորի նշխարներից մասն: Հուսկ ուրեմն Հեղինէ դշխոյի

(որ Աղուանից աշխարհիցն էր) միջնորդութեանը զիջանելով կաթուղիկոսն ու գօրավարը տալիս են Խորայէլին և Լուսաւորչի ծնօտի մասը: Խորայէլ եպիսկոպոսը ուրախութեամբ վերադառնում է Աղուանք և ս. մասունքը հագուցանում իւր մենաստանում—Գլխոյ վանքում:

Ըստ Մովսէս Կաղանկատուացու՝ Վարագ-Տրդատի օրով Խորայէլ եպիսկոպոսը եկաւ Այրարատ և Սահակ Զորափորեցուց ստացաւ ս. Լուսաւորչի ծնօտը Հեղինէ զշխոյի միջնորդութեամբ, որ Աղուանցի էր: Վարդան վարդապետը դեպքը պատահած է համարում Զուանշիրի օրով՝ որ Վարագ-Տրդատի հօր Եղբայրն էր, և Հեղինէ դշխոն ոչ այլ ոք էր, եթէ ոչ նոյն Զուանշիրի քոյրը և Գրիգոր Մամիկոնեանի կինը:

Մեր կարծիքով՝ Մովսէս Կաղանկատուացին է, դարի պատմիչ չէ, այլ ժ. և միւնցին Մովսէս Դասխուրանցին է, որ Աղուանից պատմութիւնը հասցնում է մինչև Թ. դարի վերջը (Հատ. գ. 77. ին.), իսկ կաթուղիկոսների ցանկը մինչև ժ. դարի վերջը (998):

Այդ Մովսէս Դասխուրանցին կամ Կաղանկատուացին Գլխոյ վանքում եղած ս. Լուսաւորչի անունը կրող մասունքին պատմական նշանակութիւն տալու համար՝ յերիւրում է, ս. Լուսաւորչի մարմնի բոլոր ոսկերօքն հանդերձ տեղափոխութիւնը Դարանաղիքից, որպէս զի կարողանայ առել, թէ Գլխոյ վանքի մասունքն էլ ս. Լուսաւորչի ծնօտն է, այնտեղ բերուած Խորայէլ եպիսկոպոսի ձեռքով, Աղուանից Վարագ-Տրդատ և Հայոց Գրիգոր Մամիկոնեան գօրապետների օրով, Սահակ Զորափորեցու ժամանակ:

Կաղանկատուացին՝ լինի նա և. թէ ժ. դարի պատմիչ, ս. Լուսաւորչի նշխարների տեղափոխութեան մասին չի կարող արժանահաւատ աղբիւր համարուել, որովհետեւ նա (Ա. Հատ. ին. դիմում երես 50) առաջ էլ ասել է. «Գտանէր (Վաչական) և զամենասուրբ նշխարս Գրիգորի և Պյոյժ հռչակելոյն Հոխիսսիմեայ և Գայիանեայ՝ ի Դարահոջ գեօղն՝ որ է ի նահանդին Արցախայ, զոր էր բերեալ երիցուն Մատթէ անուն, ի Յովհաննէ Հայոց կաթուղիկոսէ, զոր ունէր նորին մատանետն ինքեալ առաքեալ անդ երիցունս, առնոյր առիւր»: իսկ Վաչա-

կան Գ. թագաւորի իշխանութիւնը և Շուփհաղիշէի հայրապետութիւնը ընկնում է Ե. դարի վերջին քառորդին։ Այս տեղ ակնարկուած Յովհան կաթուղիկոսը կարող էր լինել Յովհան Մանդակունին։ Եւ նշխարքը կնքուած է հայրապետի մատանիով։ — Արդ, եթէ ըստ Կաղանկատուացու Ե. դարի վերջին արդէն Վաչական թագաւորը ստացել էր՝ ո. Գրիգորի, նաև առաջիկանց նշխարները ուրեմն ո. Լուսաւորչի նշխարները վաղուց, մօտ 200 տարի առաջ հանուած էին արդէն Թորդանի հանգստարանից և գտնուում էին Աղուանքում։ Գրիգոր Մամիկոնեանը էլ ի՞նչ հանեց այդ հանգստարանից և նորայէլ եպիսկոպոսը ի՞նչ տարաւ։

Մենք ասացինք, որ ո. Լուսաւորչի մատունքները չեն ամփոփուած Խանգարած եկեղեցու հաստացեզոյս սիւների տակ, և ցոյց տուինք յետին պատմիչների այն հակասութիւնները, որոնք ապացուցանում էին մեր ասածը։ Այժմ տեսնենք Ժամանակակից պատմիչ Աերեոսը Զուարթնոց կամ Խանգարած եկեղեցու Հիմնարկութեան համար ինչ է տում։ «Յայսմ Ժամանակի արկի միտո իւր կաթուղիկոն Հայոց Ներսէս շինել իւր բնակութիւն մերձ առ եկեղեցեացն՝ որ ի Վաղարշապատ քաղաքին, ի վերայ Ճանապարհին, յորում, ասեն, ընդ առաջ եղեւ թագաւորն Տրդատ՝ որբոյն Գրիգորի։ Եինեաց անդ եկեղեցի մի յանուն երկնաւոր Զուարթնոց, որոց երեւեալ ի տեսլեան որբոյն Գրիգորի բաղմութիւն երկնաւոր զաւրացն։ և շինեաց եկեղեցին բարձր շինուածովք և չքնաղ զարմանալեաւք, արժանի աստուածային պատուոյն՝ որում նուիրեացն» (Երես 118—119)։ Այստեղ ամենեին յիշատակութիւն չըկայ Հիմնարկութեան Ժամանակ ո. Նշխարների սների Հիմքում դրուելու մասին։ Ժամանակով ամենամօտ Վեռնդ պատմիչը (Լ. դար) նոյնպէս ոչինչ չէ զրում նշխարների մասին։ ոչինչ չեն զրում Ստեփաննոս Ասողիկ, Սամուել Անեցի և այլն։

Եթէ այդ Ժամանակ ո. Լուսաւորչի նշխարների տեղափոխութիւն լիներ, և տեղափոխուած նշխարները զրուած լինեին Զուարթնոց եկեղեցու սների Հիմքի տակ, միթէ ականատես Աերեոսը կը լուէր՝ այն Աերեոսը, որ մեծ ողեւորութեամբ նկարագրում է ո. Հռիփսիմէի տապանի երեսն

նրա վկայարանի վերաշխնութեան ժամանակ: Հետաքրքրութեան համար դնենք այդ նկարագրութիւնը (88—89). Եւ եղեւ յամի ԽԲ-բորդի թագաւորութեան Ապուրէզ Խոսրովուքակեաց կաթուղիկոսն կումիտաս զմատուռ սրբոյն Հռիփսիմեայ ի Վաղարշապատ քաղաքի, զի կարի ցած և մթին էր շինուածն: զոր շինեալ էր սրբոյն Սահակայ հայրապետի Հայոց կաթուղիկոսի՝ որդւոյ սրբոյն Ներսիսի:

«Արդ, մինչ քակեին զորմ մատրանն, երևեցաւ յանկարծակի լուսաւոր և ջընաղաղիւտ արքունական մարդարիտն այսինքն կուսական մարմին սրբոյ տիկնոջն Հռիփսիմեի: Եւ քանզի անդամ անդամ յաւշեցին զնա յաւշեալ ի միմեանց. և երանելի սրբոյն Գրիգորի կնքեալ մատանեաւ իւրով և մատանեաւ երանելոյն Սահակայ Հայոց կաթուղիկոսի, զոր նառ համարձակեցաւ բանով: Եւ կնքեալ իւրով ևս մատանեաւ, որ արժանի իսկ էր կնքել զայսալիսի մարդարիտ՝ երից հաւատարմաց երրորդ մատանեաւք:

«Ո՛վ մարդարիտ, որ ոչ ծովածին, այլ մարդարիտ, որ ծնեալ ի թաղաւորական աղդէն և սնեալ ի գիրկս սրբութեան, և նուիրեալ Աստուծոյ, որում ցանկացեալ էին տեսանել գքեղ արդարք և խանդակաթ էր ի սէր քո երանելին կումիտաս:

«Զափ հասակի էր երանելոյն ինն թզաւ և չորս մատունս. և գղրդեալ ամենայն կողմն հիւսիսոյ գայր յերկրագագութիւն. և բազում ախտաժետաց լինէր բժշկութիւն ամենայն ցաւոց: Ենինեաց զեկեղեցին՝ և զերանելին եթող ի բացեայ վասն գիշութեան որմոյն, մինչեւ ցցամաքել որմոյն, ապա ամփոփեցաւ ի կայանս իւր»:

Արդ, եթէ ս. Հռիփսիմեի նշխարների երեսումն այսքան ոգեսրութիւն է առաջ բերում, միթէ ս. Լուսաւորչի նշխարները կարող էին լուելեայն բերուել և առանց կնքեալ տասպանակի շաղ տրուել սների հիմքի տակը, գէջ հողերի մէջ, թողնելով որ հիմքից սուզւող կրազանգի ջուրը աւելի ևս գիշութիւն պատճառէր հողին, որի մէջ անշուշտ փլթութեան կենթարկուէր ս. նշխարը: Առաքել պատմագիրը (գլ. իհ) նկարագրելով ս. Գայիսանէի և ս. Հռիփսիմեի վանքերի

նորոգութեան ժամանակ ս. կոյսերի տապանների երեւումն, ս. Գայիանեանց համար ասում է. «Անդէն եղիտ երիտ տապանս ի ներքոյ հիման եկեղեցւոյն... և ընդ բանալ կափարիչ վիմացն ...» Ա. Հոկիմիմեանց համար գրում է. «Աստ ևս յայտ եկեալ գտաւ նշխար Սրբուհի կուսին Հոկիմիմեայ՝ ոչ միայն ի միում տեղեօջ, այլ յերիտ տեղիս...զերկու տեղեաց նշխարքն ի մէջ վիմաց եղեալ էին, և զմինն, որ և բազում էր նշխարքն, եղեալ էին ի մէջ փայտեայ արկեզ, որ է սնդուկ և տեղի փոքրիկ իրրե զմատուռն, շինեալ վասն նշխարաց» (տես և դլ. ձ.Զ.):

Մովսէս Կաղանիատուացին (Ա. հատոր ի.Ա. երես 50) և Սերետան ասում են, որ սրբոց նշխարները կնքւում էին հայրապետների կնիքով, և Առաքել պատմագրից տեսանք՝ որ նշխարները գրում էին տապանի մէջ: Իրրե ժամանակից կտսենք. 1870 թուականներին, երբ Գէորգ Դ. կաթուղիկոսը քանդել էր տալիս Օշականի ս. Մեսրոպի հին եկեղեցին՝ նորը շինելու համար, հարաւային գրանը մօտիկ, որմի մէջ, մի քարեայ. տփում մետաքսեայ թաշկինակներով խնամքով ծրարած սրբոց մասունքներ գանուեցին: Կրկնում ենք՝ որմի մէջ, քարեայ տփում: և ոչ հօղի մէջ շաղ տուած: Սրանից երեւում է, որ հնումն սրբոց նշխարները պահւում էին տփի կամ տապանակի մէջ: Բացի այդ պահանջւում էր կարեւոր վկայութիւն:

Նիկիական կանոները լրացնող Հայոց վարդապետների «Առհմանք և Կանոնք»-ի Ժէ. յօդուածն ասում է. «Եթէ ոք նշխարս մարտիրոսաց կամիցի դնել, առանց եպիսկոպոսի աշխարհին մի զիցէ....: Եթէ ոք ի սուրբ տեղեացն մարտիրոս բերէ, առ եպիսկոպոսն բերցէ վկայութեամք եւ թղթով եղիսկոպոսացն, ուստի բերին, և իւրեանց եպիսկոպոսի հրամանաւն դիցին՝ ուր արժան է» (Ժող. Պատմ. Արէլ արքեպոսի. Վաղարշ. 1874 թ. եր. 66.): Աւելորդ ենք համարում այլ վկայութիւններ բերելը, որովհետեւ առանց նրան էլ մեր գըրուածքը շատ երկարեց:

Եթէ ս.Լուսաւորչի նշխարները դրուած լինէին Զուարթ-նոց եկեղեցու սների տակ, անշուշտ վերև յիշուած զգուշաւորութիւնները կատարուած կը լինէին. բայց սիւնի պեղ-

ման ժամանակ չերևաց ոչ կնքած և ոչ անկնիք տուփի որի
մէջ դրուած լինէին ս. նշխարները, և ոչ վկայութեան թղթեր:
Այսպէս հերքումէ Յովհաննէս պատմաբանի, եթէ յիրաւի ու-
բիշը չէ աւելացրել ասածը ս. Լուսաւորչի նշխարների Զուարթ-
նոց եկեղեցու աների տակ դրուած լինելու մասին: Հերքումէ է
ս. Լուսաւորչի նշխարների ո՞ր և է եկեղեցու հիմքի կամ
աների տակ դրուած լինելու անհեթեթ զրոյցը, մենք էլ ա-
զատում ենք ս. նշխարները գտնելու համար ըստ Հ. Կա-
ռապետի՝ Դուինի ս. Գրիգորի, իսկ ըստ Հ. Խաչիկի՝ Վաղար-
շապատի առապարի Զուարթնոց եկեղեցու հիմքերը պրայե-
լու հարկից: Մնում է ս. Լուսաւորչի նշխարների Ե. Պարից
սկսած յայտնի լինելու հարցը: Այդ հարցն էլ բաւական
լուսաբանուած է պ. Կ. Առաւանեանցի «Ս. Լուսաւորչի Աջը»
գրքուկի մէջ:

Ս. Լուսաւորչի նշխարները Ե. Պարում արդէն Հայրապե-
տական Մայր Աթոռութիւն, այսինքն Վաղարշապատի Կաթուղի-
կէումն էին. յետոյ Հայրապետական Աթոռի հետ տեղա-
փոխուեցին Դուին և այլուր, վերջապէս զանազան տեղեր
մաս մաս բաժանուելով՝ Ե. Պարի վերջին քառորդին մի մասն
Զինոն կայսրի օրով տարուեց Կ. Պօլիս, իսկ Հայրապետանոցի
կարեռը մասն էլ 1441 թուին հայրապետական Աթոռի հետ
նորից վերահաստատուեց ս. Էջմիածնում՝ ի գէմն ս. Լուսա-
ւորչի Աջի, որ այժմ Մայր Աթոռիս կարեռը սրբութիւններից
առաջինն է:

¶.

Զուարթնոց եկեղեցու աւերակները նողի բանձր շերտերի
տակ ծածկուած չեին, եւ Հ. Խաչիկը միայն պատմական
ցուցմունիքներով չէ յայտնազործել ու պեղումն սկսել:

Ով մի անգամ Վաղարշապատի և Երեանի միջև ճա-
նապարհորդութիւն է կատարել, Վաղարշապատից և վերստի
վերայ, Ճանապարհից կ վեստ դէպ ի հարաւ, տեսել է զետնի
մակերեսյթից երկու սաժէն բարձրութեամբ Զուարթնոց եկե-

զեցու վիլուածքի կրազանդուածքը։ Ուրեմն Զուարթնոց եկեղեցին մոռացուած և հողի թանձր շերտերի տակ անհետացած հնութիւն չէր։

Բացի օտարազգիներից՝ Ճ.Թ. դարում իրանց գրուածքների մէջ Զուարթնոց եկեղեցու մասին զբել են մերայիններից շատ շատերը։ Ժիշենք մի քանիսին։

ա. Յովհաննէս եպիսկոպոս Շահլսաթունեան բաւական տեղեկութիւններ տալով Զուարթնոց եկեղեցու մասին զրում է (Ստոր. կաթ. Էջմ. և հինգ գաւառ. Արարատայ տպ. 1842 թ. Հատ. ա. եր. 285—290). «Կան այժմ և երեխն իսկ որպէս հիմունք եկեղեցւոյն և աւելի քան զմարդաշտի՝ բարձրութիւնը սեանցն, զուրկ յարտաքին կոփածոյ քարանց։ Նմանապէս երեխն և հիմունք պարսպի նորա և բրդանցն և առ նովաւ սենեկացն իսկ։ որ և ասի հանդած եկեղեցի, և անուն նորա Գրիգոր։ Այսպէս զրում էր նա պեղումից 60 տարի առաջ։

բ. Մենք ասել ենք։ «Այս եկեղեցին, որի բեկորներն անզամ հիացք են բերում՝ մարդու վերայ՝ գտնվում է Վաղարշապատից $\frac{1}{2}$ ժամ հեռաւորութեամբ դէպ ի արեւելք» (Եկեղ. պատմ. տպ. 1884 եր. 226.)։ Այսպէս գրել ենք պեղումից 18 տարի առաջ։

գ. Պ. Կ. Կոստանեանցը 1896 թուին (ս. Լուսաւորչի Աջը գրքում) ասում է. «Նայելով այդ շինութեան արդի բեկորներին՝ արդարեւ, չէ կարելի չը զարմանալ շէնքի ընդառակութեան, չքեղութեան և ամրութեան վերայ» (եր. 26)։ Այսպէս զրում է պեղումներից 4 տարի առաջ։ Ուրեմն եկեղեցու բեկորները յայտնի եին։ — Այնպիսի ժամանակի մէջ ենք ապրում, որ ամեն օր ամենքից տեսնուած բանն էլ մինչեանդամ արեւի ծագումն՝ վկաներով պէտք է հաստատենք։

Զուարթնոց եկեղեցու փոքր սիւների խոյակներից մի քանիսը, եթէ չեմ սխալում, Կարբեցի Յովհաննէս կաթուղիկոսի օրով, թերեւ Յովհ. եպիսկոպոս Շահլսաթունեանի նախաձեռնութեամբ՝ բերուելով ս. Էջմիածին, այժմ զրուած են ձեմարանի բակում հարտապյին կողմը։ Այս խոյակների համար պ. Կոստանեանցը զրում է. «Եւրոպական հնագէտ-

ները բաղմիցս ուստամասիրել և նկարագրել են այդ խոյակները. նոքա կողովաճե կերտուած ունեն և քանդակները շատ նուրբ են. իւրաքանչիւր երկուսի վերայ կան մի և նոյն յունարէն տառերը խաչաճե քանդակած ներսէս Գ. Նինողի անունով» (ա. Լուսաւորչի Աջը Երես 26—27): Պ. Կ. Կոստաննեանցը կարծում է, որ այդ խոյակները մեծ, կամ ըստ Դրասխանակերտցու՝ չորս հաստահեղոյս սիւների խոյակներն են: Այժմ, յատակի բացմամբ յայտնի եղաւ, որ զրանք մեծ սիւների խոյակները չեն, այլ փոքր:

Ճեմարանի բակում եղած այս խոյակները գտնելու համար պէտք է որ պեղումն եղած լինի Զուարթնոց եկեղեցում ՓԹ. դարի սկզբին: Հ. Խաչիկի պեղումից դեռ չորս տարի առաջ Մայր Աթոռիս միաբան Հ. Մեսրոպ վարդապետ Տէր-Մովսիսեանը Զուարթնոց եկեղեցու հարաւային արեւմտեան մի հաստահեղոյս սիւնը մինչեւ եկեղեցու յատակի մակերեւոյթը բացել էր, և գուցէ ամբողջ յատակի բանար՝ եթէ մի ձախող հանգամանք արգելք չը գտնար: Ուրիմն Զուարթնոց եկեղեցին մի կորած ու անյայտացած եկեղեցի չէր, որ Հ. Խաչիկի գտներ, և նա չէ միայն, որ Զուարթնոց եկեղեցու պեղման մասին մտածել ու գործել է՝ նրանից առաջ ել ուրիշները նոյնը արել են, բայց Հ. Խաչիկին է յաջողել գործը աւարտել:

Թէև Զուարթնոց եկեղեցին Վաղարշապատի կենտրօնում չէ եղելս ս. Լուսաւորիչը այնտեղ չէ տեսել յայտնի տեսիլը, նա Վաղարշապատի Կաթուղիկէն չէ և նրա մների տակ չեն զրուել ս. Լուսաւորչի նշխարները, բայց Զուարթնոց եկեղեցին իրեւ 1260 տարուայ հնութիւն արժանի է ուշաղրութեան. իսկ արդ հաղարամեայ աւերակ եկեղեցու ամբողջ յատակի բացմամբ, որով հաւաստիացանք, թէ Զուարթնոց եկեղեցին արժանի էր մեր պատմիչներից կոչուելու «բաղմապայծառ փարախ բանաւոր հօտից», «զանազան յօրինուածով հրաշապայծառ եկեղեցի», «զարմացուցիչտիեզերաց»: — պարտական ենք Հ. Խաչիկին:

Զը նայելով, որ մեր բոլոր պատմիչները, որոնք միշում են այդ եկեղեցու անունը, միշտ հիացմամբ են յիշում այնուամենայնիւ այդ եկեղեցին երկարատեւ զոյութիւն չէ ունեցել: Զուարթնոց եկեղեցու կարծատեւ զոյութեան պատ-

Ճառները մեր կարծիքով՝ եթէ մի կողմից տաճիկների յարձակու մներն ու աւերմօւնքներն են եղել միւս կողմից էլ եղել են՝ ա. տեղի տռապար լինելն ու անմարգաբնակութիւնը. բ. հեռաւորութեան պատճառով՝ անյարմարութիւնը իւրիսկական նպատակին ծառայելու, այն է, Վազարշապատի եկեղեցիներին մերձ՝ հայրապետական բնակարան լինելու. գ. ժողովրդի և ազգի անտարերութիւնը դէպի եկեղեցին, ատելութիւնը դէպի կառուցանողի արձնաւորութիւնը և չըհամակրելը շինութեան հանգամանքին:

Ներսէս Նինողը որպէս շինարար և առաքինի մարդ՝ ակնածելի էր. բայց որպէս յունամոլ՝ ատելի: Աերեոսը նրա մասին գրում է. «Եւ ոչ ումեք ի վեր հանէր զիստրուրդ ամբարշտութեանն, մինչև եհաս յեպիսկոպոսութիւն աշխարհին և անտի կոչեցաւ յաթու կաթուզիկոսութեան: Եւ էր այր առաքինի վարուք, պահօք և ազօթիւք. բայց ի սրտի իւրում ծածկեալ ունէր զթիւնս դառնութեան...» (եր. 140—141): Զուարթնոց եկեղեցու շինութեան հանգամանքն էլ չէր կարող հայերի սրտով լինել: — Մովսէս կաղանկատուացին Ներսէսին՝ յունաց կոստանդին կայսրի հայրագիր կոչելով՝ գրում էր. «Աս էր հայրագիր նորին կոստանդնի և գանձիւք նորա շինեաց զբազմապայծառ փարախն բանաւոր հօտից ի Քաղաքուդաշտի, ի սուրբ Գրիդոր, և ի նաւակատիս կոչեաց զթագաւորն Հոռոմոց, որ յաւէժ հիացեալ ընդ շինուածն...» (Հատ. գ. դլ. ԺԵ. եր. 255):

Ահա այս վարկումները Ներսէս Նինողի անձի և նրա շինած եկեղեցու վերաբերութեամբ կարող էին առաջացնել ազգի մէջ ատելութիւն և աւանդուել որդւոց որդի, որով մի անգամ եկեղեցին այրուելուց ու աւերուելուց յետոյ էլ չը վերաշնուեց ու աւերակ մնաց:

Մեր այսքան մանրամասնութիւնների մէջ մտնելու պատճառն էր այն, որպէս զի Զուարթնոց եկեղեցու ամբողջ պատմութիւնը պարզենք հասարակութեան առաջ՝ հասարակութեանը նախապատրաստենք զգուշութեամբ վերաբերուել լրագրների մէջ տպուած յօդուածներին և բերանացի յեղյեղուող զբոյցներին:

Լրագրներում և բերանացի զրոյցներում ի միջի այլոց դատավիետում են եւս. էջմիածինը, որը որպէս թէ չէ օժանդակել և չէ օժանդակում չ. Խաչիկին՝ Զուարթնոց եկեղեցու պեղման գործում, եւս. էջմիածնի միաբանութիւնը, որը որպէս թէ չըկամութեամբ խոշքնդոտն է լինում չ. Խաչիկին՝ պեղումն առաջ տանելու:

Ճշմարտութիւնն այն է, որ չ, Խաչիկը քաջալերութիւն և օժանդակութիւն ստացել և ստանում է ս. էջմիածնից, Վեհափառ Հայրապետից և ս. Հռիփսիմէի վանքից—դրամով, նիւթով սերմացու ցորենով և թիսած հացով։ Հ. Խաչիկը մինչեւ հոկտեմբերի վերջը ս. էջմիածնից բացի իւր միաբանական հացից օրական 56 հաց էլ ստանում էր Զուարթնոց եկեղեցու աւերակներում աշխատողների անունով։ նոյեմբերից որոշել է Վեհ. Հայրապետը հացի տեղ երեք խալվար ցորեան տալ ս. Հռիփսիմէի վանքից։ Խաչիկ Հայր-սուրբը Մայր Աթոռումն ունի լաւագոյն բնակարաններից մէկը և ստանում է միաբանների կարգում ոռձիկ։ Բացի այս, Զուարթնոց եկեղեցու շուրջը բաւական ընդարձակ տեղի վերայ վար ու ցանք է անում, և հաւաքած ու ստացած նուերներն ու օժանդակութիւնները յանուն Խանգարած եկեղեցու՝ ըստ կամս տնօրինում։

Ճշմարիտ է և այն՝ որ ինչպէս ս. էջմիածնի միաբանութիւնը նոյնպէս և ազգի խոհական մասը դժգոհ են Խաչիկ Հայր-սուրբից, նրան համարելով աղբիւրը բագրական այլանդակ յօդուածների և առասպելական զրոյցների՝ թէ ս. էջմիածինը չէ ս. Լուսաւորչի տեսլեան տեղը կառուցուած էջմիածինը, այլ Զուարթնոց եկեղեցին է, որ որպէս թէ լինելով ս. Լուսաւորչի հիմնարկածն ու նրա գերեզմանատեղին կոչում է ս. Գրիգոր։ Թէ գտնուել է մինչեւ հիմքը պեղուած սիւնի տակ ս. Լուսաւորչի մասունքը։ Թէ ս. էջմիածնի միաբանութիւնը հաշածում է Հ. Խաչիկին նրա յաջող գործունէութեան նախանձելով և այլն։ Մենք այդ տեսակ լուրերը այլանդակ և անհեթեթ առասպելական զրոյցներ համարեցինք։ Երբ դադար առնեն այդ այլանդակ ու անհեթեթ զրոյցները, կը դադարեն ամեն տեսակ յուղմունքներն էլ։ Զուարթնոց եկեղեցին կը մնայ է. դարից մնացած մի գնահատելի հնութիւն, Հ. Խաչիկն էլ

մի բազմավաստակ աշխատաւոր, արժանի շնորհակալութեան:

Մարդ ի՞նչպէս չը վրդովուի. Ճիշտ այն ժամանակի, երբ լրանում է Մայր Կաթուղիկէի հիմնարկութեան 1600 տարին, յանկարծ դուրս են գալիս առում են, թէ ամբողջ ազգից ընդունուած և պատմութեան անյեղի փաստերով նուիրագործուած Կաթուղիկէն չէ Էջմիածինը, այլ Զուարթնոց եկեղեցին: Ե'կ ու Հասկացրու, թէ Զուարթնոց եկեղեցու կառուցման ժամանակ Կաթուղիկէն 340 տարուայ Հնութիւն ունէր և չորս անդամ էլ վերանորոգուած էր: Պատմութեան տեղեակ մարդը չի մոլորուի. բայց օտարազգի՞ն, բայց ռամիկը: Ե'կ ու ռամիկին Հասկացրու, թէ ս. Լուսաւորիչը ինքնի իւր անունով եկեղեցի չէր կառուցանի, այլ նրանից յետոյ եղողները կարող են նրա անունով եկեղեցի կառուցանել. եկ ու Հասկացրու թէ, եթէ ս. Լուսաւորիչը ինքնի կառուցել Զուարթնոց կամ Խանգարած եկեղեցին, ինքնի իւր նշխարները ի՞նչպէս դրեց իւրակառոց եկեղեցու սների հիմքերի տակ:

Զուարթնոց եկեղեցու աւերակների բացմամբ այնքան այլանդակ առասպելներ և զրոյցներ Հրատարակուեցին ու խօսուեցին, որ մարդ չի կարողանում որոշել, թէ որտեղ է վերջանում սուտը և որտեղից է սկսւում Ճմարիալ. որով այդ պատուական Հնութիւնը կորցրել է իւր խսկական նշանակութիւնը:

* * *

Զուարթնոց եկեղեցու բացմամբ հետևեալ ծանր խնդիրներն են առաջ գալիս.

Այդ Հազարամեայ աւերակ եկեղեցին սլէաք է վերացնել թէ ոչ. և ինչի՞ վերաշինել. ո՞ր տեղից գտնել հարիւր Հազարներ նախկին ծեւով վերաշինելու համար. այլապէս անխորհուրդ բան կը լինի կոտէկ անդամ ծախսելը: Այժմ, որ գժուարանում ենք շեն վանքերը պահպանել, Հազարամեայ հիմնի վեր կործանուած եկեղեցին պիտի կարողանա՞նք վերաշինել ու պահպանել:

Զուարթնոց եկեղեցու աւերակների վերայ պէտք է շարունակել ծախսեր անելը. մինչեւ երբ և ինչի՞ համար:

—Ըստիս, պէտք է Զուարթնոց եկեղեցու աւերակների վերայ ինամք ունենալ. բայց զբաղեցնել մի ձեռնհաս վարդապետի միմիայն աւերակների վերայ հսկող թողնելով՝ բոլորովին աւելորդ է: Նորհակալ լինելով Հ. Խաչիկից, որ նա երեան հանեց Զուարթնոց եկեղեցու յատակն ու մերձակայ շինութիւնների մնացորդները, պէտք է նրան իւր ընդունակութեան ու եռանդին յարմար մի այլ պաշտօն տալ և չը դատապարտել, որ իւր լաւագոյն ժամանակը Խանգարած եկեղեցու աւերակներու սեացնի. իսկ Զուարթնոց եկեղեցու աւերակների վերահսկողութիւնը պէտք է յանձնել ս. Հոփսիմէի վանքի վանահօրը, պարտաւորեցնելով մի պահապան պահել այնտեղ և հսկել՝ որ հնութիւնները նորից չը ծածկուեն փոշով և աւազով: Իսկ ինչ որ արժէք ունի և կարելի է տեղափոխել՝ պէտք է բերել և զետեղել Մայր Աթոռի ժանգարանում: չը թողնելով նշաւակ բնութեան ու ժամանակի աւերմունքների և անհարազատ ձեռքերի:

Ա.միովիումն.

ա. Զուարթնոց եկեղեցին, ինչպէս աւանդում է Սերեսուը, որ ականատես պատմիչ է, կառուցուած լինելով Ներսէս Գ. Շինողից՝ անմարդաբնակ, անջուր և առապար տեղում: չերկարող լինել նախաքրիստոնէական հնութիւն՝ Երազմոյն, Երազընդհան, Երազացոյց Տիւր աստուածների մեջեան, ինչպէս զրւում է լրագրներում և խօսւում բերնէ բերան:

բ. Զուարթնոց եկեղեցին չէ կարող լինել այն տեղը, ուր ս. Լուսաւորիչ, ըստ Ագաթանգեղոսի, քաղաքամիջում: արքունի ապարանքին մօտ յայտնի տեսիլը տեսաւ, որովհետեւ Զուարթնոց եկեղեցին քաղաքի կենարոնից չորս վերստ չեռու է:

գ. Զուարթնոց եկեղեցին Մայր եկեղեցի և ս. Լուսաւորիչ աթոռ չէ եղել. նրա սների տակ չեին կարող թաղուել ս. Լուսաւորչի նշաւարները, որովհետեւ Խանգարած կամ Զուարթնոց եկեղեցին հիմնարկուել է 640—48 թուին Ներսէս Շինողի ձեռ-

քով, իսկ Լուսաւորչի մարմինը, տեղափոխուել է, ըստ Կազանկատառացու՝ 617 թուից յետոյ, այսինքն եկեղեցու հիմնարկութիւնից մօտ 40 տարի յետոյ։ Սահակ Զորափորեցու օրով։ Կաղանկատառացու ասածն էլ անպայման ծիշտ է, որովհետեւ նա ասում է որ նշխարները փոխադրուել են «բոլորովին ամենայն ոսկերօքն հանգերձ» Թորդանից, մոռանալով, որ առաջ էլ ասել էր, թէ Վաչական թագաւորը Մատթե երեցից Եղարի վերջին ստացել է ո. Լուսաւորչի նշխարը. բացի այս, ո. Լուսաւորչի մասունքը, որ 450 թուից Վարդանանց պատերազմի ժամանակից արդէն հայրապետանոցի յայտնի սրբութիւնների կարգումն էր՝ մօտ 250 տարի առաջ կար ու յայտնի էր։

Դ. Հ. Խաչիկը ոչ թէ մի անյայտացած աւերակ է զտել, այլ մի շտա յոյտնի և գեանի երեսից երկու սաժենաչափ բարձրութեամբ բեկորներ ունեցող աւերակների մէջ պեղումների միայն կատարելով՝ բացել է այդ աւերակի յատակը, որի համար և շնորհակալու թիւն իրան։

ՅՈՒՍԻԿ ԵՊԻՍԿՈՊՈՒ



ԺՈՂՈՎՈՒՐԴԻՆ ԱՌԱՋՆՈՐԴՈՂՆԵՐԸ

Անոնք որ հրապարակային պաշտօններու կը նուիրուին և ուղղակի կամ անուղղակի կերպերով կը ծառայեն ժողովուրդին, անտարակոյս, ոչ միայն մեծ գործ մը կատարած կըլլան, այլ նաև գործ մը, որ ամենամեծ պատասխանատութիւն մը ունի։ Եւ հարկաւ՝ այդ պատասխանատութիւնը աստիճան մը ունի իւրաքանչիւր առաջնորդողի համար։ Հայոց մէջ առաջնորդողներու աստիճանները շատ կնճռոտ չեն, բայց կարելոր են։ Այսօր հայերը երեք որոշ դասակարգեր ունին առաջնորդողներու. հայ ուսուցչութիւնը, հայ եկեղեցականութիւնը և հայ